中国古代志怪小说茶座二

百年好读编辑部 主编

珠海百年电子音像出版社

书名:中国古代志怪小说茶座二

著作:百年好读编辑部

出版社:珠海百年电子音像出版社

出版日期:2006-07

丛书名:茶余饭后古代小说版

ISBN 7-90048-00-9 /I • 60

定价:10.00

目 录

劳山道士

梦狼

席方平

画 皮

青 凤

晚霞

汪士秀

婴 宁

罗刹海市

续黄粱

张鸿渐

促 织

黄 英

小 翠

聂小倩

红 玉

桃夭村

鲛 奴

村 姬

谭 九

翠衣国

秦吉了

青 眉

假 鬼

老学究

南皮许南金

劳山道士

邑有王生,行七,故家子。少慕道,闻劳山多仙人,负笈往游。登一顶,有观宇,甚幽。一道士坐蒲团上,素发垂领,而神观爽迈。叩而与语,理甚玄妙。请师之,道士曰:"恐娇惰不能作苦。"答曰:"能之。"其门人甚众,薄暮毕集;王俱与稽首,遂留观中。

凌晨, 道士呼王去, 授以斧, 使随众采樵。王谨受教。过月 余, 手足重茧, 不堪其苦, 阴有归志。一夕归, 见二人与师共酌。 日已暮, 尚无灯烛。师乃剪纸如镜, 粘壁间。俄顷, 月明辉室, 光鉴毫芒。诸门人环听奔走。一客曰:"良宵胜乐,不可不同。" 乃于案上取壶酒,分赍诸徒,且嘱尽醉。王自思:七八人,壶酒 何能遍给?遂各觅盎盂,竟饮先酹,惟恐樽尽;而往复挹注,竟 不少减。心奇之。俄,一客曰:"蒙赐月明之照,乃尔寂饮,何不 呼嫦娥来?"乃以箸掷月中。见一美人自光中出,初不盈尺,到 地,遂与人等。纤腰秀项,翩翩作霓裳舞。已而歌曰:"仙仙乎! 而还乎! 而幽我于广寒乎!" 其声清越, 烈如箫管。歌毕, 盘旋而 起,跃登几上,惊顾之间,已复为箸。三人大笑。又一客曰:"今 宵最乐,然不胜酒力矣。其饯我于月宫可乎?"三人移席,渐入 月中。众视三人坐月中饮,须眉毕见,如影之在镜中。移时,月 渐暗。门人燃烛来,则道士独坐,而客杳矣。几上肴核尚存,壁 上月,纸园如镜而已。道士问众:"饮足乎?"曰:"足矣。""足 宜早寝,勿误樵苏。"众诺而退。王窃欣慕,归念遂息。

又一月,苦不可忍,而道士并不传教一术。心不能待,辞曰: "弟子数百里受业仙师,纵不能得长生术,或小有传习,亦可慰求教之心。今阅两三月,不过早樵而暮归;弟子在家,未谙此苦。"道士笑曰: "我固谓不能作苦,今果然。明早当遣汝行。"王曰: "弟子操作多日,师略授小技,此来为不负也。"道士问: "何术之求?"王曰: "每见师行处,墙壁所不能隔,但得此法足矣。"道士笑而允之。乃传以诀,令自咒,毕,乎曰: "入之!"王面墙,不敢入。又曰: "试入之。" 王果从容入,及墙而阻。道士曰: "俯首骤入,勿逡巡。" 王果去墙数步,奔而入。及墙,虚若无物;回视,果在墙外矣。大喜,入谢。道士曰: "归宜洁持,否则不验。"遂助资斧,遣之归。

抵家,自诩遇仙,坚壁所不能阻。妻不信。王效其作为,去 墙数尺,奔而入,头触硬壁,蓦然而仆。妻扶视之,额上坟起如 巨卵焉。妻揶揄之。王惭愤,骂老道士之无良而已。

异史氏曰:"闻此事未有不大笑者;而不知世之为王生者,正复不少。今有伧父,喜疢毒而畏药石,遂有舐痈吮痔者,进宣威逞暴之术,以迎其旨。给之曰:'执此术也以往,可以横行而无碍。'初试,未尝不小效,遂谓天下之大,举可以如是行矣,势不至触硬壁而颠蹶,不止也。"

(《聊斋志异》)

梦狼

白翁,直隶人。长子甲,筮仕南服,二年无耗。适有瓜葛丁姓造谒,翁款之。丁素走无常,谈次,翁辄问以冥事。丁对语涉幻,翁不深信,但微哂之。

别后数日, 翁方卧, 见丁又来, 邀与同游。从之夫, 入一城 阙。移时,丁指一门曰:"此间君家甥也。"时翁有姐子为晋令。 讶曰:"乌在此?"丁曰:"倘不信,入便知之。"翁入,果见甥, 蝉冠豸绣,坐堂上,戟幛行列无人可通。丁曳之出,曰:"公子衙 署,去此不远,亦愿见之否?"翁诺。少间,至一第,丁曰:"入 之。"又入一门,见堂上、堂下,坐者、卧者,皆狼也。又视墀中, 白骨如山, 益惧。丁乃以身翼翁而进。公子甲方自内出, 见父及 丁,良喜。少坐,唤侍者治肴蔌。忽一巨狼衔死人入。翁战惕而 起曰:"此胡为者?"甲曰:"聊充庖厨。"翁急止之。心怔忡不宁, 辞欲出, 而群狼阻道, 进退方无所主。勿见诸狼纷然嗥避, 或窜 床下,或伏几底,错愕不解其故。俄有两金甲猛士努目入,出黑 索索甲。甲扑地化为虎,牙。一人出利剑,敛枭其首。一 人曰: "且勿, 且勿, 此明年四月间事, 不如姑敲齿去。" 乃出巨 锤锤齿, 齿零落堕地。虎大吼, 声震山岳。翁大惧, 忽醒, 乃知 其梦。心异之。遣人招丁,丁辞不至。

翁乃志其梦,使次子指甲,函戒哀切。既至,见兄门齿尽脱, 骇而问之,则醉中坠马所折。考其时,则父梦之日也。益骇,出 父书。甲读之色变,为间曰:"此幻想梦之适符耳。何足怪!"时 方赂当路者,得首荐,故不以妖梦为意。弟居数日,见其蠹役满堂,纳贿关说者,中夜不绝,流涕谏止之。甲曰:"弟日居衡茅,故不知仕途之关窍耳。黜涉之权,在上台不在百姓。上台喜,便是好官;爱百姓,何求能令上台喜也?"弟知不可劝止,遂归,悉以告翁。翁闻之大哭,无可如何。惟损家济贫,日祷于神,但求逆子之报,不累妻孥。次年,报甲以荐举做吏部,贺者盈门。翁惟唏嘘,伏枕托疾不出。未几,闻子归途遇寇,主仆殒命。翁乃起,谓人曰:"鬼神之怒,止及其身,佑我家者不可谓不厚也。"因焚香而报谢之。慰藉翁者,咸以为道路之讹。惟翁则深信不疑,刻日为之营兆,而甲固未死。

先是,四月间,甲解任甫离境,即遇寇。甲倾装以献之。诸寇曰:"我等之来,为一邑之民泄冤愤耳,宁专为此哉!"遂决其首。又问家人:"有司大成者谁是?"司故甲之腹心,助桀为虐者。家人共指之,贼亦决之。更有蠹役四人,甲聚敛臣也,将携入都,并搜决讫,始分资入囊,骛驰而去。甲魂伏道旁,见一宰官过,问:"杀者何人?"前驱者曰:"某县白知县也。"宰官曰:"此白某之子,不宜使老后见此凶惨,宜续其头。"即有一人掇头置腔上,曰:"邪人不宜使正,以肩承颔可也。"遂去。移时复苏。妻子往收其尸,见有余息,载之以行。从容灌之,亦受饮。但寄旅邸,贫不能归。半年许,翁始得确耗,遣次子致之而归。甲虽复生,而且能自顾其背,不复齿人数矣。

翁姐子有政声,是年行取为御史,悉符所梦。

异史氏曰:"窃叹天下之官虎而吏狼者,比比也。即官不为虎,

而吏且将为狼,况有猛于虎者耶!夫人患不能自顾其后耳,苏而 使之自顾,鬼神之教微矣哉!"

(《聊斋志异》)

席方平

席方平, 东安人。其父名廉, 性戆拙。因与里中富室羊姓有隙, 羊先死; 数年, 廉病垂危, 谓人曰: "羊某今贿嘱冥使搒我矣。"俄而, 身赤肿, 号呼遂死。席惨怛不食, 曰: "我父朴讷, 今见凌于强鬼; 我将赴地下, 代伸冤气耳。"自此不复言, 时坐时泣, 状类痴, 盖魂已离舍矣。

席觉初出门,莫知所往,但见路有行人,便问城邑。少选,入城。其父已收狱中。至狱门,遥见父卧檐下,似甚狼狈;举目见子,潸然涕流。便谓: "狱吏悉受贿嘱,日夜搒掠,胫股摧残甚矣!"席怒,大骂狱吏:"父如有罪,自有王章,岂汝等死魅所能操耶!"遂出,抽笔为词。值城隍早衙,喊冤以投。羊惧,内外贿通,始出质理。城隍以所告无据,颇不直席。席忿气无所复伸,冥行百余里,至郡,以官役私状,告之郡司。迟至半月,始得质理。郡司扑席,仍批城隍覆案。席至邑,备受械梏,惨冤不能自舒。城隍恐其再讼,遣役押送归家。役至门辞去。席不肯入,遁赴冥府,诉郡邑之酷贪。冥王立拘质对。二官窑遣腹心,与席关说,许以千金。席不听。过数日,逆旅主人告曰:"君负气已甚,

官府求和而执不从,今闻于王前各有函讲,恐事殆矣。" 席以道路 之口, 犹未深信。俄有皂衣人唤入。升堂, 见冥王有怒色, 不容 置词,命笞二十。席厉声问:"小人何罪?"冥王漠若不闻。席受 笞,喊曰:"受笞允当,谁教我无钱耶!"冥王益怒,命置火床。 两鬼捽席下, 见东墀有铁床, 炽火其下, 床面通赤。鬼脱席衣, 掬置其上, 反复揉捺之。痛极, 骨肉焦黑, 苦不得死。约一时许, 鬼曰:"可矣。"遂扶起,促使下床着衣,犹幸跛而能行。复至堂 上, 冥王问:"敢再讼乎?"席曰:"大冤未伸, 寸心不死, 若言 不讼,是欺王也。必讼!"又问:"讼何词?"席曰:"身所受者, 皆言之耳。"冥王又怒,命以锯解其体。二鬼拉去,见立木,高八 九尺许,有木板二,仰置其下,上下凝血模糊。方将就缚,忽堂 直大呼: "席某", 二鬼即复押回。冥王又问: "尚敢讼否?"答云: "必讼!"冥王命捉去速解。既下,鬼乃以二板夹席,缚木上。锯 方下, 觉顶脑渐辟, 痛不可禁, 顾亦忍而不号。闻鬼曰:"壮哉此 汉!"锯降降然寻至胸下。又闻一鬼云:"此人大孝无辜,锯令稍 偏,勿损其心。"遂觉锯锋曲折而下,其痛倍苦。俄顷,半身辟矣。 板解,两身俱仆。鬼堂大声以报。堂上传呼,令合身来见。二鬼 即推令复合, 曳使行。席觉锯缝一道, 痛欲复裂, 半步而仆。一 鬼于腰间出丝带一条授之曰:"赠此以报汝孝。"受而束之,一身 顿健, 殊无少苦。遂升堂而状。冥王复问如前, 席恐再罹酷毒, 便答:"不讼矣。"冥王立命送还阳界。隶率出北门,指示归途, 反身遂去。

席念阴曹之暗昧尤甚于阳间,来无路可达帝听;世传灌口二

郎为帝勋戚,其神聪明正直,诉之当有灵异。窃喜两隶已去,遂转身南向。奔驰间,有二人追至,曰:"王疑汝不归,今果然矣。"捽回复见冥王。窃意冥王益怒,祸必更惨;而王殊无厉容,谓席曰:"汝志诚孝。但汝父冤,我已为若雪之矣。今已往生富贵家,何用汝鸣呼为?今送汝归,予以千金之产、期颐之寿,于愿足乎?"乃注籍中,嵌以巨印,使亲视之。席谢而下。鬼与俱出,至途,驱而骂曰:"奸猾贼!频频反复,使人奔波欲死!再犯,当捉入大磨中,细细研之!"席张目叱曰:"鬼子胡为者!我性耐刀锯,不耐挞楚。请返见王。王如令我自归,亦复何劳相送。"乃返奔。二鬼惧,温语劝回。席故蹇缓,行数步,辄憩路侧。鬼怒不敢复言。

约半日,至一村,一门半开,鬼引与共坐,席便据门阈。二鬼乘其不备推入门中。惊定自视,身已生为婴儿。愤啼不乳,三日遂殇,魂摇摇不忘灌口。约奔数十里,忽闻羽葆来,幡戟横路,越道避之,因犯卤簿。为前马所执,絷送车前。仰见车中一少年,丰仪瑰玮。问席:"何人?"席冤愤正无所出,且意是必巨官,或当能作威福,因缅诉毒痛。车中人命释其缚,使随车行。俄至一处,官府十余员,迎谒道左。车中人各有问讯,已而指席谓一官曰:"此下方人,正欲往诉,宜即为之剖决。"席询之从者,始知车中即上帝殿下九王,所嘱即二郎也。席视二郎,修躯多髯,不类世间所传。九王既去,席从二郎至一官廨,则其父与羊姓并衙隶俱在。少顷,槛车中有囚人出,则冥王及郡司、城隍也。当堂对勘,席所言皆不妄。三官战粟,状若伏鼠。二郎援笔立判。顷之,传下判语,令案中人共视之。判云:

勘得冥王者, 职膺王爵, 身受帝恩, 自应贞洁 以率臣僚, 不

当贪墨, 以速官谤。

而乃繁缨棨戟,徒夸品秩之尊;羊狠狼贪,竟玷人臣之节。 斧敲斤 ,妇子之皮骨皆空;鱼食鲸吞,蝼蚁之微生可悯。当掬 西江之水,为尔湔肠;即烧东壁之床,请君入瓮。城隍、郡司, 为小民父母之官,司上帝牛羊之牧。虽则职居下列,而尺瘁者不 辞折腰;即或势逼大僚,而有志者亦应强项。乃上下其鹰鸷之手, 既罔念夫民贫;且飞扬其狙狯之奸,更不嫌乎鬼瘦。惟受赃而枉 法,真人面而兽心!是宜剔髓伐毛,暂罚冥死;所当脱皮换革, 仍令胎生。隶役者,既有鬼曹,便非人类。只宜公门修行,庶还 落蓐之身;何得苦海生波,益造弥天之孽?飞扬跋扈,狗脸生六 月之霜;隳突叫号,虎威断九衢之路。肆淫威于冥界,咸知狱吏 为尊;助酷虐于昏官,共以屠伯是惧。当于法场之内,剁其四肢; 更向汤镬之中,捞其筋骨。羊某富而不仁,狡而多诈。金光盖地, 因使阎摩殿上,尽是阴霾;铜臭熏天,遂教枉死城中,全无日月。 余腥犹能役鬼,大力直可通神。宜籍羊氏之家,以赏席生之孝。

即押赴东岳施行。

又谓席廉:"念汝子孝义,汝性良懦,可再赐阳寿三纪。"因使两人送之归里。席乃抄其判词,途中父子共读之。既至家,席先苏;令家人启棺视父,僵尸犹冰,俟之终日,渐温而活。乃索抄词,则已无矣。

自此,家日益丰,三年间,良沃遍野,而羊氏子孙微矣,楼 阁田产,尽为席有。里人或有买其田者,夜梦神人叱之曰:"此席 家物,汝乌得有之!"初未深信;既而种作,则终年升斗无所获, 于是复鬻归席。席父九十余岁而卒。

异史氏曰:"人人言净土,而不知生死隔世,意念都迷,且不知其所以来,又乌知其所以去;而况死而又死,生而复生者乎? 忠孝志定,万劫不移,异哉席生,何其伟也!"

(《聊斋志异》)

画皮

太原王生,早行,遇一女郎,抱 独奔。甚艰于步。急走趁之,乃二八姝丽。心相爱乐,问:"何夙夜踽踽独行?"女曰:"行道之人,不能解愁忧,何劳相问。"生曰:"卿何愁忧?或可效力,不辞也。"女黯然曰:"父母贪赂,鬻妾朱门。嫡妒甚,朝詈而夕楚辱之,所弗堪也,将远遁耳。"问:"何之?"曰:"在亡之人,乌有定所。"生言:"敝庐不远,即烦枉顾。"女喜,从之。生代携物,导与同归。女顾室无人,问:"君何无家口?"答云:"斋耳。"女曰:"此所良佳。如怜妾而活之,须秘密,勿泄。"生诺之。乃与寝合。使匿密室,过数日而人不知也,生微告妻。妻陈,疑为大家媵妾,劝遣之。生不听。

偶适市,遇一道士,顾生而愕,问:"何所遇?"答言:"无之。"道士曰:"君身邪气萦绕,何言无?"生又力白。道士乃去,曰:"惑哉!世固有死将临而不悟者。"生以其言异,颇疑女;转思明明丽人,何至为妖,意道士借魇禳以猎食者。无何,至斋门。

门内杜,不得入。心疑所作,乃逾垝垣,则室门亦闭。蹑足而窗窥之,见一狩鬼,面翠色,齿巉巉如锯,铺人皮于榻上,执采笔而绘之。已而掷笔,举皮如振衣状,披于身,遂化为女子。睹此状,大惧,兽伏而出。急追道士,不知所往。遍迹之,遇于野,长跪乞救。道士曰:"请遣除之。此物亦良苦,甫能觅代者,予办不忍伤其生。"乃以蝇拂授生,令挂寝门。临别,约会于青帝庙。生归,不敢入斋,乃寝内室,悬拂焉。一更许,闻门外戢戢有声。自不敢窥,使妻窥之。但见女子来,望拂子不敢进;立而切齿,良久乃去。少时,复来,骂曰:"道士吓我。终不然,宁入口而吐之耶!"取拂碎之,坏寝门而入,径登生床,裂生腹,掬生心而去。妻号,婢入烛之,生已死,腔血狼藉。陈骇涕不敢声。

明日,使弟二郎奔告道士。道士怒曰:"我固怜之,鬼子乃敢尔!"即从生弟来。女子已失所在。既而仰首四望,曰:"幸遁未远。"问:"南院谁家?"二郎曰:"小生所舍也。"道士曰:"现在君所。"二郎愕然,以为未有。道士问曰:"曾否有不识者一人来?"答曰:"仆早赴青帝庙,良不知。当归问之。"去少顷而返,曰:"果有之。晨间一妪来,欲佣为仆家操作;室人止之,尚在也。"道士曰:"即是物矣。"遂与俱往,仗木剑,立庭心,呼曰:"孽魅偿我拂子来!"妪在室惶遽无色,出门欲遁。道士逐击之。妪仆,人皮划然而脱,化为厉鬼,卧嗥如猪。道士以木剑枭其首。身变作浓烟,匝地作堆。道士出一葫芦,拔其塞,置烟中,飗飗然如口吸气。瞬息烟尽,道士塞口入囊。共视人皮,眉目手足,无不备具。道士卷之,如卷画轴声,亦囊之。乃别,欲去。

陈氏拜迎于门, 哭求回生之法。道士谢不能。陈益悲, 伏地 不起。道士沉思曰:"我术浅,诚不能起死。我指一人,或能之, 往求必合有效。"问:"何人?"曰:"市上有疯者,时卧粪土中, 试叩而哀之。倘狂辱夫人,夫人勿怒也。"二郎亦习知之,乃别道 十,与嫂俱往。见乞人癫歌道上,鼻涕三尺,秽不可近。陈膝行 而前。乞人笑曰:"佳人爱我乎?"陈告之故。又大笑曰:"人尽 夫也,活之何为。"陈固哀之。乃曰:"异哉!人死而乞活于我, 我阎罗耶?"怒以杖击陈,陈忍痛受之。市人渐集如堵。乞人咯 痰唾盈把,举向陈吻曰:"食之!"陈红涨于面,有难色。既思道 士之嘱,遂强啖焉。觉入喉中,硬如团絮,格格而下,停结胸间。 乞人大笑曰:"佳人爱我哉!"遂起,行已不顾。尾之,入于庙中。 迫而求之,不知所在,前后冥搜,殊无端兆,惭恨而归。既悼亡 夫之惨,又悔食唾之羞,俯仰哀啼,但愿即死。方欲展血敛尸, 家人伫望,无敢近者。陈抱尸收肠,且理且哭。哭极声嘶,顿欲 呕, 觉膈中结物, 突奔而出, 不及回首, 已落腔中。惊而视之, 乃人心也, 在腔中突突犹跃, 热气腾蒸如烟然。大异之, 急以两 手合腔,极力抱挤:少懈,则气氤氲自缝中出。乃袭缯帛,急束 之。以手抚尸,渐温。覆以衾稠。中夜启视,有鼻息矣。天明竟 活。为言:"恍惚若梦,但觉腹隐痛耳。"视破处, 痂结如钱, 寻 愈。

异史氏曰:"愚哉世人!明明妖也,而以为美。迷哉愚人!明明忠也,而以为妄,然爱人之色而渔之,妻亦将食人唾而甘之矣, 天道好还,无往不复,但愚而迷者不悟耳,可哀也夫!"

(《聊斋志异》)

青凤

太原耿氏,故大家,第宅宏阔。后凌夷,楼舍边亘,半旷废之,因生怪异,堂门辄自开掩,家人恒中夜骇哗。耿患之。移居别墅,留老翁门焉。由此荒落益甚,或闻笑语歌吹声。

耿有从子去病, 狂放不羁, 嘱翁有所闻见, 奔告之。至夜, 见楼上灯光明灭,走报生。生欲入觇其异。止之,不听。门户素 所习识, 竟拔蓬蒿, 曲折而入。登楼, 殊无少异。穿楼而过, 闻 人语切切。潜窥之, 见巨烛双烧, 其明如昼。一叟儒冠南面坐, 一媪相对,俱年四十余。东向一少年,可二十许。右一女郎,才 及笄耳。酒胾满案,围坐笑语。生突入,笑呼曰:"有不速之客一 人来!"群惊奔匿。独叟出叱问:"谁何入人闺闼?"生曰:"此我 家闺闼, 君占之, 旨酒自饮, 不一邀主人, 毋乃太吝?"叟审睇 曰:"非主人也。"生曰:"我狂生耿去病,主人之从子耳。"叟致 敬曰:"久仰山斗。"乃揖生入。便呼家人易馔,生止之。叟乃酌 客,生曰:"吾辈通家,座客无庸见避,还祈招饮。"叟呼:"孝儿!" 俄少年自外入。叟曰:"此豚儿也。"揖而坐。略审门阀,叟自言: "义君姓胡。"生素豪,谈议风生;孝儿亦倜傥:倾吐间,雅相爱 悦。生二十一,长孝儿二岁,因弟之。叟曰:"闻君祖纂《涂山外 传》,知之乎?"答:"知之。"叟曰:"我涂山氏之苗裔也。唐以 后, 谱系犹能忆之; 五代而上无传焉。幸公子一垂教也!" 生略述 涂山女佐禹之功,粉饰多词,妙绪泉涌。叟大喜,谓子曰:"今幸 得闻所未闻。公子亦非他人,可请阿母及青凤来共听之,亦令知

我祖德也。"孝儿入帏中。少时,媪偕女郎出。审顾之,弱态生娇, 秋波流慧,人间无其丽也。叟指妇云:"此为老荆。"又指女郎:"此 青凤,鄙人之犹女也。颇慧,所闻见,辄记不忘,故唤令听之。" 生谈竟而饮,瞻顾女郎,停睇不转。女觉之,辄俯其首。生隐蹑 莲钩,女急敛足,亦无愠怒。生神志飞扬,不能自主,拍案曰:"得 妇如此,西南王不易也!"媪见生渐醉益狂,与女惧起,遽搴帏去。 生失望,乃辞叟出,而心萦萦,不能忘情于青凤也。

至夜复往,则兰麝犹芳,而凝待终宵,寂无声咳。归与妻谋, 欲携家而居之,冀得一遇。妻不从。生乃自往,读于楼下。夜方 凭几,一鬼披发入,面黑如漆,张目视生。生笑,染指砚墨自涂, 灼灼然相与对视。鬼惭而去。次夜, 更既深, 灭烛欲寝, 闻楼后 发扃,辟之砰然。生急起窥觇,则扉半启。俄闻履声细碎,有烛 光自房中出。视之,则青凤也。骤见生,骇而却退,遽阖双扉。 生长跪而致词曰:"小生不避险恶,实以卿故。幸无他人,得一握 手为笑, 死不憾耳。"女遥语曰:"惓惓深情,妾岂不知。但吾叔 闺训严,不敢奉命。"生因哀之云:"亦不敢望肌肤之亲,但一见 颜色足矣。"女似肯可, 启关出, 捉之臂而曳之。生狂喜, 相将入 楼下, 拥而加诸膝。女曰:"幸有夙分。过此一夕, 即相思无用矣。" 问:"何故?"曰:"阿叔畏君狂,故化厉鬼以相吓,而君不动也。 今已卜居他所。一家皆移什物卦新居,而妾留守,明日即发矣。" 言已欲去,云:"恐叔归。"生强止之,欲与为欢。方持论间,叟 掩入。女羞惧无以自容,俯首倚床, 拈带不语。叟怒曰:"贱婢辱 吾门户!不速去,鞭挞且从其后!"女低头急去。叟亦出。尾而听 之,呵诟万端,闻青凤嘤嘤啜泣。生心意如割,大声曰:"罪在小

生,于青凤何与!倘宥凤也,刀锯斧钺,小生愿身受之!"良久寂静,生乃归寝。自此第内绝不复声息矣。

生叔闻而奇之,愿售以居,不较值。生喜,携家口而迁焉。 居逾年,甚适,而未尝须臾忘青凤也。

会清明上墓归,见小狐二,为犬逼逐。其一投荒窜去;一则惶急道上,望见生,依依哀啼,塌耳戢首,似乞其援。生怜之,启裳襟,提抱以归。闭门,置床上,则青凤也。大喜,慰问。女曰:"适与婢子戏,遭此大厄。脱非郎君,必葬犬腹。望无以非类见憎。"生曰:"日切怀思,系于魂梦。见卿如获异宝,何憎之云!"女曰:"此天数也!不因颠覆,何得相从?然幸矣,婢子必以妾为己死,可与君坚永约耳。"生喜,另舍居之。

积二年余。生方夜读,孝儿忽入。生辍读,讶诘所来。孝儿 伏地怆然曰: "家君有横难,非君莫拯。将自诣恳,恐不见纳,故以某来。"问:"何事?"曰:"公子识莫三郎否?"曰:"此吾年家子也。"孝儿曰:"明日将过。倘携有猎狐,望君之留之也。"生曰:"楼下之羞,耿耿在念,他事不敢预闻。必欲仆效绵薄,非青风来不可。"孝儿零涕曰:"风妹已野死三年矣!"生拂衣,曰:"既尔,则恨滋深耳!"执卷高吟,殊不顾瞻。孝儿起,哭失声,掩面而去。生如青凤所,告以故。女失色曰:"果救之否?"曰:"救则救之,适不之诺者,亦聊以报前横耳。"女乃喜曰:"妾少孤,依叔成立。昔虽获罪,乃家范应尔。"生曰:"诚然,但使人不能无介介耳。卿果死,定不相援。"女笑曰:"忍哉!"次日,莫三郎果至,镂膺虎 ,仆从甚赫。生门逆之。见获禽甚多,中一

黑狐,血殷毛革; 抚之,皮肉犹温。便托裘敝,乞得补缀。莫慨然解赠。生即付青凤,乃与客饮。客既去,女抱狐于怀,三日而苏,展转复化为叟。举目见凤,疑非人间。女历言其情。叟乃下拜,惭谢前愆。喜顾女曰:"我固谓汝不死,今果然矣。"女谓生曰:"君如念妾,还乞以楼宅相假,使妾得以申返哺之私。"生诺之。叟赧然谢别而去。入夜,果举家来。由此如家人父子,无复猜忌矣。生斋居,孝儿时共谈宴。生嫡出子渐长,遂使傅之;盖循循善教,有师范焉。

(《聊斋志异》)

晚霞

五月五日,吴越间有斗龙舟之戏: 刳木为龙,绘鳞甲,饰以金碧;上为雕甍朱槛,帆旌皆以锦绣;舟末为龙尾,高丈余,以布索引木板下垂,有童坐板上,颠倒滚跌,作诸巧剧。下临江水,险危欲堕。故其购是童也,先以金啖其父母,预调驯之,堕水而死,勿悔也。吴门则载美妓,较不同耳。

镇江有蒋氏童阿端,方七岁,便捷奇巧,莫能过,声价益起,十六岁犹用之。至金山下,堕水死。蒋媪止此子,哀鸣而已。阿端不自知死,有两人导去,见水中别有天地;回视,则流波四绕,屹如壁立。俄现宫殿,见一人兜牟坐。两人曰:"此龙窝君也。"便使拜伏。龙窝君颜色如霁,曰:"阿端伎巧可入柳条部。"遂引

至一所,广殿四合。趋上东廊,有诸少年出与为礼,率十三四岁。即有老妪来,众呼"解姥"。坐令献技。已乃教以钱塘飞霆之舞,洞庭和风之乐。但闻鼓钲黄■聒,诸院皆响。既而诸院皆息。姥恐阿端不能即娴,独絮絮调拨之;而阿端一过,殊已了了。姥喜曰:"得此儿,不让晚霞矣!"

明日,龙窝君按部,诸部毕集。首按夜叉部,鬼面鱼服。鸣 大钲, 围四尺许; 鼓可四人合抱之, 声如巨霆, 叫噪不复可闻。 舞起,则巨涛汹涌,横流空际,时堕一点星光,及着地消灭。龙 窝君急止之, 命进乳莺部, 皆二八姝丽, 笙乐细作。一时清风习 习,波声俱静,水渐凝如水晶世界,上下通明。按毕,俱退立西 墀下。次按燕子部,皆垂髫人。内一女郎,年十四五岁,振袖倾 鬟,作散花舞;翩翩翔起,襟袖袜履间,皆出五色花朵。随风飏 下,飘泊满庭。舞毕,随其部亦下西墀。阿端旁睨,雅爱好之。 问之同部,即晚霞也。无何,唤柳条部。龙窝君特试阿端。端作 前舞,喜怒随腔,俯仰中节。龙窝君嘉其慧悟,赐五文裤褶,鱼 须金束发,上嵌夜光珠。阿端拜赐下,亦趋西墀,各守其伍。端 于众中遥注晚霞,晚霞亦遥注之。少间,端逡巡出部而北,晚霞 亦渐出部而南: 相去数武,而法严不敢乱部,相视神驰而已。既 按蛱蝶部, 童男女皆双舞, 身长短、年大小、服色黄白, 皆取诸 同。诸部按已,鱼贯而出。柳条在燕子部后,端疾出部前,而晚 霞已缓滞在后。回首见端,故遗珊瑚钗,端急纳袖中。

既归,凝思成疾,眠餐顿废。解姥辄进甘旨,日三四省,抚 摩殷切,病不少瘥,姥忧之,罔所为计,曰:"吴江王寿期已迫,

目为奈何!"薄暮,一童子来,坐榻上与语,自言:"隶蛱蝶部。" 从容问曰:"君病为晚霞否?"端惊问:"何知?"笑曰:"晚霞亦 如君耳。"端凄然起坐,便求方计。童问:"尚能步否?"答云:"勉 强尚能自力。"童挽出,南启一户:折而西,又辟双扉。见莲花数 十亩,皆生平地上:叶大如席,花大如盖,落瓣堆梗下盈尺。童 引入其中,曰:"姑坐此。"遂去。少时,一美人拨莲花而入,则 晚霞也。相见惊喜,各道相思,略述生平。遂以石压荷盖令侧, 雅可障蔽:又匀铺莲瓣而藉之,欣与狎寝。既订后约,日以夕阳 为候,乃别。端归,病亦妹愈。由此两人日一会于莲亩。过数日, 随龙窝君往寿吴江王。称寿已,诸都悉还,独留晚霞及乳莺部一 人在宫中教舞,数月更无音耗,端怅惘若失。惟解姥日往来吴江 府。端托晚霞为外妹,求携去,冀一见之。留吴江门下数日,宫 禁森严,晚霞苦不得出,怏怏而返。积月余,痴想欲绝。一日, 解姥入, 戚然相吊曰:"惜乎! 晚霞投江矣!"端大骇, 涕下不能 自止。因毁冠裂服,藏金珠而出,意欲相从俱死。但见江水若壁, 以首力触不得入。念欲复还, 惧问冠服, 罪将增重。意计穷蹙, 汗流浃踵。忽睹壁下有大树一章, 乃猱攀而上, 渐至端杪: 猛力 跃堕, 幸不沾濡, 而竟已浮水上。不意之间, 恍睹人世, 遂飘然 泅去。移时得岸,少坐江滨,顿思老母,遂趁舟而去。

抵里,四顾居庐,忽如隔世。越趄至家,忽闻窗中有女子曰: "汝子来矣。"音声甚似晚霞。俄与母俱出,果晚霞也。斯时两人 喜胜于悲;而媪则悲疑惊喜,万状具作矣。初,晚霞在吴江,觉 腹中震动。龙宫法禁严,恐旦夕身娩,横遭挞楚;又不得一见阿 端,但欲求死,遂潜投江水。身泛起,浮沉波中。有客舟拯之,

问其居里。晚霞故吴名妓,溺水不得其尸。自念行院不可复投, 遂曰:"镇江蒋氏,吾婿也。"客因代贳扁舟送诸其家。蒋媪疑其 错误,女自言不误,因以其情详告娼。娼以其风格婉妙,颇爱悦 之; 第虑年太少, 必非肯终寡也者。而女孝谨, 顾家中贫, 便脱 珍饰售数万。娼察其志无他,良喜。然无子,恐一旦临蓐,不见 信于戚里,以谋女。女曰:"母但得真孙,何必求人知。"媪亦安 之。会端至,女喜不自己。媪亦疑儿不死,阴发儿冢,骸骨俱存。 因以此诘端,端始爽然自悟。然恐晚霞恶其非人,嘱母勿得言。 母然之。遂告同里,以为当日所得非儿尸,然终虑其不能生子。 未几,竟举一男,捉之无异常儿,始悦。久之,女渐觉阿端非人, 乃曰:"胡不早言!凡鬼衣龙宫衣七七,则魂魄坚凝,生人不殊矣。 若得宫中龙角胶,可以续骨节而生肌肤,惜不早购之也。"端货其 珠,有贾胡出资百万,家由此巨富。值母寿,夫妻歌舞称觞,遂 传闻淮王邸。王欲强夺晚霞。端惧,见王自陈:"夫妇皆鬼。"验 之无影而信,遂不之夺。但遣宫人就别院传其技。女以龟尿毁容, 而后见之。教三月,终不能尽其技而去。

(《聊斋志异》)

汪士秀

汪士秀, 庐州人。刚勇有力, 能举石春。父子善蹴鞠。父四 十余, 过钱塘溺焉。

积八九年, 汪以故诣湖南, 夜泊洞庭。时望月东升, 澄江如 练。方眺瞩间,忽有五人自湖中出,携大席,平铺水面,略可半 亩。纷陈酒馔, 馔器磨触作响, 然声温厚, 不类陶瓦。已而三人 践席坐,二人侍饮。坐者一衣黄,二衣白:头上巾皆皂色,峨峨 然下连肩背,制绝奇古,而月色微茫,不甚可哳。侍者俱褐衣: 其一似童,其一似叟也。但闻黄衣人曰:"今夜月色大佳,足供快 饮。"白衣者曰:"此夕风景,大似广利王宴梨花岛时。"三人互劝, 引爵浮白。但语略小,即不可闻。舟人隐伏,不敢动息。汪细审 侍者叟, 酷类父: 而听其言, 又非父声。二漏将残, 忽一人曰: "趁 此月明, 官一击球为乐。"即见僮没水中, 取一圆出, 大可盈抱, 中如水银满贮, 表里通明。坐者尽起。黄衣人呼叟共蹴之。蹴起 丈余,光摇摇射人眼。俄而轰然远起,飞堕舟中。汪技痒,仍力 踏去, 觉异常轻软。踏猛似破, 腾寻丈: 中有漏光, 下射如虹: 然疾落,又如经天之彗,直投水中,滚滚作沸泡声而灭。 席中 共怒曰:"何物生人,败我清兴!"叟笑曰:"不恶不恶,此吾家流 星拐也。"白衣人嗔其语戏,怒曰:"都方厌恼,老奴何得作欢? 便同小乌皮捉得狂子来:不然,胫股当有椎吃也!"汪计无所逃, 即亦不畏,捉刀立舟中。倏见僮叟操兵来。汪注视,真其父也。 疾呼: "阿翁! 儿在此。" 叟大骇, 相顾凄然。僮即返身去。叟曰: "儿急作匿,不然都死矣。"言未已,三人忽已登舟。面皆漆黑, 睛大于榴。攫叟出。汪力与夺,摇舟断缆。汪以刀力截其臂落, 黄衣者乃逃,一白衣人奔汪; 汪剁其颅,堕水有声,哄然俱没。 方谋夜渡,旋见巨喙出水面,深若井。四面湖水奔注,砰砰作响。 俄一喷涌,则浪接星头,万舟簸荡。湖人大怒。舟上有石鼓二,

皆重百斤。汪举一以投,激水雷鸣,浪渐消;又投其一,风波悉乎。汪疑父为鬼。叟曰:"我固未尝死也。溺江中者十之九人,皆为妖物所食;我以踏圆得全。物得罪于钱塘君,故移避洞庭耳。三人,鱼精;所蹴,鱼胞也。"父子聚喜,中夜击棹而去。天明,见舟中有鱼翅,径四五尺许,乃悟是夜间所断臂也。

(《聊斋志异》)

婴 宁

王子服, 莒之罗店人。早孤, 绝慧, 十四入泮, 母最爱之, 寻常不令游郊野。聘萧氏, 未嫁而夭, 故求凰未就也。

会上元,有舅氏子吴生,邀同眺瞩。方至村外,舅家有仆来,招吴去。生见游女如云,乘兴独遨。有女郎携婢,捻梅花一枝,容华绝代,笑容可掬。生注目不移,竟忘顾忌。女过去数武,顾婢曰:"个儿郎目灼灼似贼!"遗花地上,笑语自去。生拾花怅然,神魂丧失,快快遂返。至家,藏花枕底,垂头而睡,不语亦不食。母忧之。醮禳益剧,肌革锐减,医师诊视,投剂发表忽忽若迷。母抚问所由,默然不答。适吴生来,嘱密诘之。吴至榻前,生见之泪下。吴就榻慰解,渐致研诘。生具吐其实,且求谋划。吴笑曰:"君意亦复痴,此愿有何难遂?当代访之。徒步于野,必非世家。如其未字,事固谐矣,不然,拚以重贿,计必允遂。但得痊瘳,成事在我。"生闻之,不觉解颐。吴出告母,物色女子居里,

而探访既穷,并无踪绪。母大忧,无所为计。然自吴夫后,颜顿 开,食亦略进。数日,吴复来。生问所谋,吴绐之曰:"已得之矣。 我以为谁何人, 乃我姑氏女, 即君姨妹, 今尚待聘。虽内戚有婚 姻之嫌,实告之,无不谐者。"生喜溢眉宇,问:"居何里?"吴 诡曰:"西南山中, 去此可三十余里。"生又咐嘱再四, 吴锐身自 任而去。生由此饮食渐加, 日就平复。探视枕底, 花虽枯, 未便 凋落,凝思把玩,如见其人。怪吴不至,折简招之。吴支托不肯 卦召。生恚怒,悒悒不欢。母虑其复病,急为议姻。略与商榷, 辄摇首不愿。惟日盼吴。吴迄无耗, 益怨恨之。转思三十里非遥, 何必仰息他人?怀梅袖中,负气自往,而家人不知也。伶仃独步, 无可问程,但望南山行夫。约三十余里,乱山合沓,空翠爽肌。 寂无人行, 止有鸟道。遥望谷底从花乱树中, 隐隐有小里落。下 山入村, 见舍字无多, 皆茅屋, 而意甚修雅。北向一家, 门前皆 丝柳,墙内桃杏犹繁,间以修竹,野鸟格磔其中。意其园亭,不 敢遽入。回顾对户,有巨石滑洁,因据坐少憩。俄闻墙内有女子 长呼"小荣!"其声娇细。方伫听间,一女郎由东而西,执杏花一 朵,俯首自簪:举头见生,遂不复簪,含笑捻花而入。审视之, 即上元途中所遇也。生骤喜,但念无以阶进。欲呼姨氏,顾从无 还往,惧有讹误。门内无人可问。坐卧徘徊,自朝至于日昃,盈 盈望断,并忘饥渴。时见女子露半面来窥,似讶其不去者。忽一 老媪扶杖出,顾生曰:"何处郎君,闻自辰刻便来,以至于今,意 将何为?得勿饥耶?"生急起揖之,答云:"将以盼亲?"媪聋聩 不闻。又大言之。乃问:"贵戚何姓?"生不能答。媪笑曰:"奇 哉!姓名尚自不知,何亲可探?我视郎君,亦书痴耳。不如从我

来, 啖以粗粝, 家有短榻可卧。待明朝归, 询知姓氏, 再来探访, 不晚也。"生方腹馁思啖,又从此渐近丽人,大喜,从媪入。见门 内白石砌路,夹道红花,片片堕阶上:曲折而西,又启一关,豆 棚花架满庭中。肃客入舍, 粉壁光明 如镜; 窗外海棠, 枝朵探入 室中。茵藉几榻, 罔不洁泽。甫坐, 即有人自窗外隐约相窥。媪 唤:"小荣,可速作黍!"外有婢子声而应。坐次,具展宗阀。媪 曰:"郎君外祖,莫姓吴否?"曰:"然。"媪惊曰:"是吾甥也! 尊堂, 我妹子, 年来以家窭贫, 又无三尺男, 遂至音问梗塞。甥 长成如许,尚不相识。"生曰:"此来即为姨也,匆遽遂忘姓氏。" 媪曰:"老身秦姓,并无诞育;弱息仅存,亦为庶产。渠母改蘸, 遗我鞠养,颇亦不钝: 但少教训,嬉不知愁。少顷,使来拜识。" 未几,婢子具饭,雏尾盈握。媪劝餐已,婢来敛具。媪曰:"唤宁 姑来。"婢应去。良久,闻户外隐笑声。媪又唤曰:"婴宁!汝姨 兄在此。"户外嗤嗤笑不已。婢推之以入,犹掩其口,笑不可遏。 **媪**瞋目曰:"有客在,咤咤叱叱,是何景象!"女忍笑而立,生揖 之。媪曰:"此王郎,汝姨子。一家尚不相识,可笑人也。"生问: "妹子年几何矣?" 娼未能解。生又言之。女复笑,不可仰视。 媪谓生曰:"我言少教诲,此可见矣。年已十六,呆痴才如婴儿。" 生曰:"小于甥一岁。"曰:"阿甥已十七矣,得非庚午属马者耶?" 生首应之。又问:"甥妇阿谁?"答云:"无之。"曰:"如甥才貌, 何十七岁犹未聘耶?婴宁亦无姑家,极相匹敌,惜有内亲之嫌。" 生无语,目注婴宁,不暇他瞬。婢向女小语云:"目灼灼,贼腔未 改。"女又大笑,顾婢曰:"视碧桃开未?"遽起,以袖掩口,细

碎连步而出。至门外,笑声始纵。媪亦起,唤婢补被,为生安置。 曰:"阿甥来不易,宜留三五日,迟迟送汝归。如嫌幽闷,舍后 有小园,可供消遣。有书可读。"

次日,至舍后,果有园半亩,细草铺毡,杨花糁径。有草舍 三楹,花木四合其所。穿花小步,闻树苏苏有声,仰视,则婴宁 在上。见生来,狂笑欲堕。生曰:"勿尔!堕矣!"女且下且笑, 不能自止。方将及地, 失手而堕, 笑乃止。生扶之, 阴捘其腕, 女笑又作, 倚树不能行, 良久乃罢。生俟其笑歇, 乃出袖中花示 之。女接之曰:"枯矣,何留之?"曰:"此上元妹子所遗,故存 之。"问:"存之何意?"曰:"以示相爱不忘也。自上元相遇,凝 思成疾,自分化为异物,不图得见颜色,幸垂怜悯!"女曰:"此 大细事。至戚何所靳惜?待兄行时,园中花,当唤老奴来,折一 巨捆负送之。"生曰:"妹子痴耶?"女曰:"何便是痴?"曰:"我 非爱花,爱捻花之人耳。"女曰:"葭莩之情,爱何待言!"生曰: "我所谓爱, 非瓜葛之爱, 乃夫妻之爱。"女曰:"有以异乎?" 曰:"夜共枕席耳。"女俯思良久,曰:"我不惯与生人睡!"语未 已, 婢潜至, 生惶恐遁去。少时, 会母所。母问: "何往?" 女答 以园中共话。娼曰:"饭熟已久,有何长言,啁嗻乃尔?"女曰: "大哥欲我共寝。"言未已,生大窘,急目瞪之,女微笑而止。幸 媪不闻,犹絮絮究诘。生急以他词掩之,因小语责女。女曰:"适 此语不应说耶?"生曰:"此背人语。"女曰:"背他人,岂得背老 母?且寝处亦常事,何讳之?"生恨其痴,无术可以悟之。食方 意,家中人捉双卫来寻生。先是,母待生久不归,始疑。村中搜 觅几遍, 竟无踪兆。因往询吴。吴忆曩言, 因教于西南山行觅。

凡历数村,始至于此。生出门,适相值。便入告媪,且请偕女同归。媪喜曰:"我有志,匪伊朝夕,但残躯不能远涉。得甥携妹子去,识认阿姨,大好!"呼婴宁,宁笑至。媪曰:"有何喜,笑辄不辍?若不笑,当为全人。"因怒之以目。乃曰:"大哥欲同汝去,可便装束。"又饷家人酒食,始送之出,曰:"姨家田产丰裕,能养冗人。到彼且勿归,小学诗礼,亦好事翁姑。即烦阿姨为汝择一良匹。"二人遂发。至山坳回顾,犹依稀见媪倚门北望也。

抵家,母睹姝丽,惊问为谁。生以姨妹对。母曰:"前吴郎与 儿言者, 诈也。我未有姐, 何以得甥?"问女, 女曰:"我非母出。 父为秦氏,没时,儿在褓中,不能记忆。"母曰:"我一姐适秦氏, 良确。然殂谢已久,那得复存?"因细诘面庞痣赘,一一符合。 又疑曰: "是矣。然亡已多年,何得复存?"疑虑间,吴生至,女 避入室。吴询得故,惘然久之。忽曰:"此女名婴宁耶?"生然之。 吴极称怪事。问所自知,吴曰:"秦家姑去世后,姑丈鳏居,祟于 狐,病瘠死。狐生女名婴宁,绷卧床上,家人皆见之。姑丈没。 狐犹时来。后求天师符粘壁间,狐遂携女去。将勿此耶?"彼此 疑参。但闻室中吃吃,皆婴宁笑声。母曰:"此女亦太憨生。"吴 请面之。母入室,女犹浓笑不顾。母促令出,始极力忍笑,又面 壁移时,方出。才一展拜,翻然遽入,放声大笑。满室妇女,为 之粲然。吴请往觇其异,就便执柯。寻至村所,庐舍全无,山花 零落而已。吴忆姑葬处, 仿佛不远, 然坟垄湮没, 莫可辨识, 诧 叹而返。母疑其为鬼。入告吴言,女略无骇意;又吊其无家,亦 殊无悲意,孜孜憨笑而已。众莫之测。母令与少女同寝止,昧爽

即来省问。操女红,精巧绝伦。但善笑,禁之亦不可止。然笑处嫣然,狂而不损其媚;人皆乐之。邻女少妇,争承迎之。母择吉将为合卺,而终恐为鬼物。窃于日中窥之,形影殊无少异。至日,使华妆行新妇礼,女笑极不能俯仰,遂罢。生以其憨痴,恐泄漏房中隐事,而女殊密秘,不肯道一语。每值母忧怒,女至,一笑即解。奴婢小过,恐遭鞭楚,辄求诣母共话;罪婢投见,恒得免。而爱花成癖,物色遍戚党;窃典金钗,购佳种,数月,阶砌藩溷,无非花者。

庭后有木香一架,故邻西家。女每攀登其上,摘供簪玩。母时遇见,辄诃之,女卒不改。一日,西邻子见之,凝注倾倒,女不避而笑。西邻子谓女意已属,心益荡。女指墙底,笑而下。西邻子谓示约处,大悦。及昏而往,女果在焉。就而淫之,则阴如锥刺,痛彻于心,大号而仆。细视,非女,则一枯木卧墙边,所接乃水淋窍也。邻父闻声,急奔研间,呻而不言。妻来,始以实告。 火烛窍,见中有巨蝎,如小蟹然。翁碎木,捉杀之。负子至家,半夜寻卒。邻人讼生,讦发婴宁妖异。邑宰素仰生才,稔知其笃行士,谓邻翁讼诬,将杖责之。生为乞免,遂释而归。母谓女曰:"憨狂尔尔,早知过喜而伏忧也。邑令神明,幸不牵累;设糊涂官宰,必逮妇女质公堂,我儿何颜见戚里?"女正色,矢不复笑。母曰:"人罔不笑,但须有时。"而女由是竟不复笑。虽故逗之,亦终不笑;然竟日未尝有戚容。

一夕,对生零涕。异之。女哽咽曰:"曩以相从日浅,言之恐致骇怪;今察姑及郎,皆过爱无有异心,直告或无妨乎?妾本狐产。母临去,以妾托鬼母,相依十余年,始有今日。妾又无兄弟,

所侍者惟君。老母岑寂山阿,无人怜而合厝之,九泉辄为悼恨。 君倘不惜烦费,使地下人消此怨恫,庶养女者不忍溺弃。"生诺之; 然虑坟冢迷于荒草。女但言:"无虑。"刻日,夫妻舆榇而往。女 于荒烟错楚中,指示墓处,果得媪尸,肤革犹存。女抚哭哀痛。 舁归,寻秦氏墓合葬焉。是夜,生梦媪来称谢,寤而述之。女曰: "妾夜见之,嘱勿惊郎君耳。"生恨不邀留,女曰:"彼鬼也,生 人多,阳气胜,何能久居?"生问小荣,曰:"是亦狐,最黠。狐 母留以视妾。每摄果饵相哺,故德之常不去心。昨问母,云已嫁 之。"由是岁至寒食,夫妻登秦墓,拜扫无缺。女逾年生一子,在 怀抱中,不畏生人,见人辄笑,亦大有母风云。

异史氏曰: "观其孜孜憨笑,似全无心肝者,而墙下恶作剧, 其點孰甚焉! 至凄恋鬼母,反笑为哭,我婴宁殆隐于笑者矣。窃 闻山中有草,名 '笑矣乎'。嗅之,则笑不可止。房中值此一种, 则合欢、忘忧,并无颜色矣。若解语花,正嫌其作态耳。"

(《聊斋志异》)

罗刹海市

马骏,字龙媒,贾人子。美丰姿。少倜傥喜歌舞。辄从梨园子弟,以锦帕缠头,美如好女,因复有"俊人"之号。十四岁,入郡痒,即知名。父衰老,罢贾而居。谓生曰:"数卷书,饥不可煮,寒不可衣。吾儿可仍继父贾。"马由是稍稍权子母。

从人浮海,为飓风引夫。数昼夜,至一都会,其人皆奇丑: 见马至,以为妖,群哗而走。马初见其状,大惧;迨知国人之骇 己也,遂反以此欺国人。遇饮食者,则奔而往:人惊遁,则啜其 余。久之,入山村。其间形貌亦有似人者,然褴褛如丐。马息树 下,村人不敢前,但遥望之。久之, 觉马非噬人者,始稍稍近就 之。马笑与语。其言虽异,亦半可解。马遂自陈所自。村人喜, 遍告邻里:"客非能搏噬者。"然奇丑者望望即去,终不敢前;其 来者,口鼻位置,尚皆与中国同。共罗浆酒奉焉。马问其相骇之 故。答曰:"尝闻祖父言:'西去二万六千里,有中国,其人民 形象率诡异。'但耳食之,今始信。"问其何贫,曰:"我国所重, 不在文章,而在形貌。其美之极者,为上卿;次任民社;下焉者, 亦邀贵人宠, 故得鼎烹以养妻子。若我辈初生时, 父母皆以为不 祥,往往置弃之:其不忍遽弃者,皆为宗嗣耳。"问:"此名何国?" 曰:"大罗刹国。都城在北去三十里。"马请导往一观。于是鸡 鸣而兴,引与俱夫。

天明,始达都。都以黑石为墙,色如墨。楼阁近百尺。然少瓦,覆以红石;拾其残块磨甲上,无异丹砂。时值朝退,朝中有冠盖出,村人指曰:"此相国也。"视之,双耳皆背生,鼻三孔,睫毛覆目如帘。又数骑出,曰:"此大夫也。"以次各指其官职,率狰狞怪异,然位渐卑,丑亦渐杀。无何,马归,街衢人望见之,噪奔跌蹶,如逢怪物。村人百口解说,市人始敢遥立。既归,国中无大小,咸知村有异人,于是缙绅大夫,争欲一广见闻,遂令村人邀马。然每至一家,阍人辄阖户,丈夫女子窃窃自门隙中窥语;终一日,无敢延见者。村人曰:"此间一执戟郎,曾为先王出

使异国, 所阅人多, 或不以子为惧。"造郎门。郎果喜, 揖为上宾。 视其貌,如八九十岁人。目睛突出,须卷如猾。曰:"仆少奉王命, 出使最多: 独未尝至中华。今一百二十余岁, 又得睹上国人物, 此不可不上闻于天子。然伏卧林下,十余年不践朝阶,早旦为君 一行。"乃具饮馔,修主客礼。酒数行,出女乐十余人,更番歌舞。 貌类夜叉,皆以白锦缠头,拖朱衣及地: 扮唱不知何词,腔拍恢 诡。主人顾而乐之,问:"中国亦有此乐乎?"曰:"有。"主人请 拟其声,遂击桌为度一曲。主人喜曰:"异哉!声如凤鸣龙啸,得 未曾闻。"翌日,趋朝,荐诸国王。王欣然下诏。有二三大臣,言 其怪状,恐惊圣体。王乃止。郎出告马,深为扼腕。居久之,与 主人饮而醉,把剑起舞,以煤涂面作张飞。主人以为美,曰:"请 君以张飞见宰相,宰相必乐用之,厚禄不难致。"马曰:"嘻!游 戏犹可,何能易面目图荣显?"主人国强之,马乃诺。主人设筵, 邀当路者饮,令马绘面以待。未几,客至,呼马出见客。客讶曰: "异哉!何前媸而今妍也!"遂与共饮,甚欢。马婆娑歌"弋阳曲", 一座无不倾倒。

明日,交章荐马。王喜。召以族节。既见,问中国治安之道,马委曲上陈,大蒙嘉叹,赐宴离宫。酒酣,王曰:"闻卿善雅乐,可使寡人得而闻之乎?"马即起舞,亦效白锦缠头,作靡靡之音。王大悦,即日拜下大夫。时与私宴,恩宠殊异。久而官僚百执事,颇觉其面目之假;所至,辄见人耳语,不甚与款洽。马至是孤立,

■然不自安。遂上疏乞休致,不许;又告休沐,乃给三月假。于是乘传载金宝,复归山村。村人膝行以迎。马以金资分给旧所与

交好者,欢声雷动。村人曰:"吾侪小人受大夫赐,明日赴海市,当求珍玩,以报大夫。"问:"海市何地?"曰:"海中市:四海鲛人集货珍宝;四方十二国,均来贸易。中多神人游戏。云霞障天,波涛间作。贵人自重,不敢犯险阻,皆以金帛付我辈,代购异珍。今其期不远矣。"问所自知,曰:"每见海上朱鸟往来,七日即市。"马问行期,欲同游瞩。村人劝使自重。马曰:"我顾沧海客,何畏风涛?"

未几,果有踵门寄资者,遂与装资入船。船容数十人,平底 高栏。十人摇橹,激水如箭。凡三日,遥见水云幌漾之中,楼阁 层叠; 贸迁之舟, 纷集如蚁。少时, 抵城下, 视墙上砖皆长与人 等, 敌楼高接云汉。维舟而入, 见市上所陈, 奇珍异宝, 光明射 眼, 多人世所无。一少年乘骏马来, 市人尽奔避, 云是"东洋三 世子"。世子过,目生曰:"此非异域人。"即有前马者来诘乡籍。 生揖道左,具展邦族。世子喜曰:"既蒙辱临,缘分不浅!"于是 授生骑,请与连辔。乃出西城。方至岛岸,所骑嘶跃入水。生大 骇失声,则见海水中分,屹如壁立。俄睹宫殿,玳瑁为梁,鲂鳞 作瓦: 四壁晶明, 鉴影炫目。下马揖入。仰见龙君在上。世子启 奏: "臣游市廛,得中华贤士,引见大王。"生前拜舞。龙君乃言: "先生文学士,必能衙官屈宋。欲烦椽笔赋 '海市',幸无吝珠 玉。"生稽首受命。授以水精之砚,龙鬣之毫,纸光似雪,墨气如 兰。生立成千余言,献殿上。龙君击节曰:"先生雄才,有光水国 多矣!"遂集诸龙族,宴集采霞宫。酒灸数行,龙君执爵向客曰: "寡人所怜女,未有良匹,愿累先生。先生倘有意乎?"生离席 愧荷,唯唯而已。龙君顾左右语。无何,宫人数辈,扶女郎出。

佩环声动,鼓吹暴作,拜竟,睨之,实仙人也。女拜已而去。少时酒罢,双鬟挑画烛,导生入副宫。女浓妆坐伺。珊瑚之床,饰以八宝;帐外流苏,缀明珠如斗大;衾褥皆香软。天方曙,则雏女妖鬟,奔入满侧。生起,趁出朝谢。拜为驸马都尉。以其赋驰传诸海。诸海龙君,皆专员来贺,争折简招驸马饮。生衣绣裳,驾青虬,呵殿而出。武士数十骑,背调弧,荷白棓,晃耀填拥。马上弹筝,车中奏玉。三日间,遍历诸海。由是"龙媒"之名,噪于四海。

宫中有玉树一株, 围可合抱; 本莹澈, 如白琉璃; 中有心, 淡黄色,梢细于臂:叶类碧玉,厚一钱许,细碎有浓阴。常与女 啸咏其下。花开满树、状类簷卜。每一瓣落、锵然作响。拾视之, 如赤瑙雕镂, 光明可爱。时有异鸟来鸣, 毛金碧色, 尾长于身, 声等哀玉,侧人肺腑。生每闻之,辄念故上。因谓女曰:"亡出三 年, 恩慈间阻, 每一念及, 涕膺汗背。卿能从我归乎?"女曰:"仙 尘路隔,不能相依。妾亦不忍以鱼水之爱,夺膝下之欢。容徐谋 之。"生闻之, 泣不自禁。女亦叹曰:"此势之不能两全者也!"明 日,生自外归。龙君曰:"闻都尉有故土之思,诘旦促装,可乎?" 生谢曰:"逆旅孤臣,过蒙优宠,衔报之诚,结于肺肝。容暂归省, 当图复聚耳。"入暮,女置酒话别。生订后会。女曰:"情缘尽矣。" 生大悲,女曰:"归养双亲,见君之孝。人生聚散,百年犹旦暮耳, 何用作儿女哀泣? 此后妾为君贞, 君为妾义, 两地同心, 即伉俪 也;何必旦夕相守,乃谓之偕老乎?若渝此盟,婚姻不吉。倘虑 中馈乏人,纳婢可耳。更有一事相嘱: 自奉裳衣,似有佳朕,烦

君命名。"生曰:"其女耶,可名龙宫; 男耶,可名福海。"女乞一物为信。生在罗刹国所得赤玉莲花一对,出以授女。女曰:"三年后四月八日,君当泛舟南岛,还君体胤。"女以鱼革为囊,实以珠宝,授生曰:"珍藏之,数世吃著不尽也。"天微明,王设祖帐,馈遗甚丰。生拜别出宫。女乘白羊车,送诸海涘。生上岸下马,女致声珍重,回车便去。少顷便远。海水复合。不可复见。

生乃归。自浮海去,家人无不谓其已死:及至家,人皆诧异。 幸翁媪无羔,独妻已他适。乃悟龙女"守义"之言,盖已先知也。 父欲为生再婚: 生不可, 纳婢焉。谨志三年之期, 泛舟岛中。见 两儿坐浮水面,拍流嬉笑,不动亦不沉。近引之,儿哑然捉生臂, 跃入怀中。其一大啼,似嗔生之不援己者,亦引上之。细审之, 一男一女, 貌皆俊秀。额上花冠缀玉, 则赤莲在焉。背有锦囊, 拆视得书,云:"翁姑计各无恙。忽忽三年,红尘永隔:盈盈一水, 青鸟难通。结想为梦, 引领成劳, 茫茫蓝蔚, 有恨如何也! 顾念 奔月姮娥, 且虚桂府: 投梭织女, 犹怅银河。我何人斯, 而能永 好? 兴思及此, 辄复破涕为笑。别后两月, 竟得孪生。今已啁啾 怀抱,颇解笑言: 觅枣抓梨,不母可活。敬以还君。所贻赤玉莲 花, 饰冠作信。膝头抱儿时, 犹妾在左右也。闻君克践旧盟, 意 愿斯慰。妾此生不二,之死靡他。奁中珍物,不蓄兰膏; 镜里新 妆, 久辞粉黛。君似征人, 妾作嫠妇, 即置而不御, 亦何得谓非 琴瑟哉!独计翁姑亦既抱孙,曾未一觌新妇,揆之情理,亦属缺 然。岁后阿姑窀穸,当往临穴,一尽妇职。过此以往,则"龙宫' 无恙,不少把握之期;'福海'长生,或有往还之路。伏惟珍重, 不尽欲言。"生反复省书揽涕。两儿抱颈曰:"归休乎!"生益恸,

抚之曰:"儿知家在何许?"儿泣啼,呕哑言归。生望海水茫茫,极天无际,雾鬟人渺,烟波路穷。抱儿返悼,怅然遂归。

生知母寿不永,周身物悉为预具,墓中植松槚百余。逾岁, 媪果亡。灵舆至殡宫,有女子缞绖临穴。众方惊顾,忽而风激雷 轰,继以急雨,转瞬间已失所在。松柏新植多枯,至是皆活。福 海稍长,辄思其母,忽自投入海,数日始还。龙宫以女子不得往, 时掩户泣。一日,昼瞑,龙女忽入,止之曰:"儿自成家,哭泣何 为?"乃赐八尺珊瑚一树、龙脑香一贴、明珠百颗、八宝嵌金合 一双,为作嫁资。生闻之,突入,执手啜泣。俄顷,疾雷破屋, 女已无矣。

异史氏曰: "花面逢迎,世情如鬼。嗜痂之癖,举世一辙。'小惭小好,大惭大好。'若公然带须眉以游都市,其不骇而走者,盖几希矣。彼陵阳痴子,将抱连城玉向何处哭也?呜呼!显荣富贵,当于蜃楼海市中求之耳!"

(《聊斋志异》)

续黄粱

福建曾孝廉,高捷南宫时,与二三同年,遨游郭外。偶闻毗 卢禅院寓一星者,因并骑往诣问卜。入室而坐。星者见其意气扬 扬,稍佞谀之。曾摇箑微笑,便问:"有蟒玉分否?"星者正容, 许二十年太平宰相。曾大悦,气益高。值小雨,乃与游侣避雨僧 舍。舍中一老僧,深目高鼻,坐蒲团上,偃蹇不为礼。众一举手,登榻自话,群以宰相相贺。曾心气殊高,指同游曰:"某为宰相时,推张年丈作南抚,家中表为参、游,我家老苍头亦得小千、把,于愿足矣。"一坐大笑。

俄闻门外雨益倾注, 曾倦伏榻间, 忽见有二中使, 赍天子手 诏,召曾太师决国计。曾得意疾趋入朝。天子前席,温语良久。 命三品以下, 听其黜陟: 即赐蟒玉名马。曾被服稽首以出。入家, 则非旧所居第, 绘栋雕榱, 穷极壮丽。自亦不解, 何以遽至于此。 然捻须微呼,则应诺雷动。俄而公卿赠海物,伛偻足恭者,叠出 其门。六卿来,倒展而迎: 侍郎辈, 揖与语: 下此者, 颔之而已。 晋抚馈女乐十人,皆是好女子。其尤者为袅袅、仙仙,二人尤蒙 宠顾。科头休沐, 日事声歌, 一日, 念微时尝得邑绅王子良周济 我,今置身青云,渠尚蹉跎仕路,何不一引手?早旦一疏,荐为 谏议,即奉谕旨,立行擢用。又念郭太仆曾睚眦我,即传吕给谏 及侍御陈昌等,授以意旨:越日,弹章交至,奉旨削职以去。恩 怨了了,颇快心意。偶出郊衢,醉人适触卤簿,即遣人缚付京尹, 立毙杖下。接第连阡者, 皆畏势, 献沃产。自此富可埒国。无何 而袅袅、仙仙以次殂谢,朝夕遐想。忽忆曩年见东家女绝美,每 思购充媵御, 辄以绵薄违宿愿, 今日幸可适志。乃使干仆数辈, 强纳资于其家。俄顷,藤舆舁至,则较昔之望见时,尤艳绝也。 自顾生平,于愿斯足。

又逾年,朝士窃窃,似有腹非之者。然各为立仗马。曾亦高情盛气,不以置怀抱间。有龙图学士包上疏,其略曰:"窃以曾某,原一饮赌无赖,市井小人。一言之合,荣膺圣眷,父紫儿朱,恩

宠为极。不思捐躯糜顶,以报万一:反恣胸臆,擅作威福。可死 之罪, 擢发难数! 朝廷名器, 居为奇货, 量缺肥瘠, 为价重轻。 因而公卿将士,尽奔走于门下,估计夤缘,俨如负贩,仰息望尘, 不可算数。或有杰士贤臣,不肯阿附,轻则置之闲散,重则褫以 编氓。其且一臂不袒,辄迕鹿马之好,片语方干,远窜豺狼之地。 朝士为之寒心,朝廷因而孤立。又且平民膏腴,任肆蚕食:良家 女子,强委禽妆。诊气冤氛,暗无天日!奴仆一到,则守、令承 颜, 书函一投,则司、院杆法。或有厮养之儿,瓜葛之亲,出则 乘传,风行雷动。地方之供给稍迟,马上之鞭挞立至。荼毒人民, 奴隶官府,扈从所临,野无青草。而某方炎炎赫赫,怙宠无悔。 召对方承干阙下, 萋斐辄进于君前: 委蛇才退于自公, 声歌已起 于后苑。声色狗马,昼夜荒淫;国计民生,罔存念虑。世上宁有 此宰相乎! 内外骇讹, 人情汹汹。若不急加斧锧之诛, 势必酿成 操、莽之祸。臣夙夜祗惧,不敢宁处,冒死列款,仰达宸听,伏 祈断奸佞之头,籍贪冒之产,上回天怒,下快舆情。如果臣言虚 谬,刀锯鼎镬,即加臣身。"云云。

疏上,曾闻之,气魄悚骇,如饮冰水。幸而皇上优容,留中不发。继而科、道、九卿,交章劾奏;即昔之拜门墙、称假父者,亦反颜相向。奉旨籍家,充云南军。子任平阳太守,已差员前往提问。曾方闻旨惊怛,旋有武士数十人,带剑操戈,直抵内寝,褫其衣冠,与妻并系。俄见数夫运资于庭,金银钱钞以数百万,珠翠瑙玉数百斛,幄幕帘榻之属,又数千事,以至儿襁女舄,遗坠庭阶。曾一一视之,酸心刺目。又俄而一人掠美妾出,披发娇

啼, 玉容无主。悲火烧心, 含愤不敢言。俄而楼阁仓库并已封志。 立叱曾出。监者牵挽罗曳而出。夫妻吞声就道,求一下驷劣车, 少作代步,亦不可得。十里外,妻足弱,欲倾跌,曾时以一手相 攀引。又十余里,已亦困惫。歘见高山,直插霄汉,自忧不能登 越,时挽妻相对泣。而监者狞目来窥,不容稍停驻。又顾斜日已 坠,无可投止,不得已,参差蹩足而行。比至山腰,妻力已尽, 泣坐路隅。曾亦憩止, 任监者叱骂。忽闻百声齐噪, 有群盗各操 利刃, 跳梁而前。监者大骇, 逸夫。曾长跪告曰:"孤身远谪, 橐 中无长物,"哀求宥免。群盗裂眦宣言:"我辈皆被害冤民,只乞 得佞贼头,他无索取。"曾怒叱曰:"我虽待罪,乃朝廷命官,贼 子何敢尔!"贼亦怒,以巨斧挥曾项。觉头堕地作声,魂方骇疑, 即有二鬼来, 反接其手, 驱之行。行逾数刻, 入一都会。顷之, 睹宫殿:殿上一丑形王者,凭几决罪福。曾前,葡伏请命。王者 阅郑,才数行,即震怒曰:"此欺君误国之罪,宜置油鼎!"万鬼 群和, 声如雷霆。即有巨鬼捽至墀下。见鼎高七尺已来, 四围炽 炭,鼎足尽赤。曾觳觫,哀啼,窜迹无路。鬼以左手抓发,右手 握踝, 抛置鼎中。觉块然一身, 随油波而上下: 皮肉焦灼, 痛彻 于心: 沸油入口, 煎烹肺腑。念欲速死, 而万计不能得死。约食 时,鬼方以巨叉取曾出,复置堂下。王又检册籍。怒曰:"倚势凌 人, 合受刀山狱!"鬼复捽去, 见一山, 不其广阔: 而峻削壁立, 利刃纵横,乱如密笋。先有数人罥肠刺腹于其上,呼号之声,惨 绝心目。鬼促曾上,曾大哭退缩。鬼以毒锥刺脑,曾负痛乞怜。 鬼怒,捉曾起,望空力掷。觉身在云霄之上,晕然一落,刃交于 胸,痛苦不可言状。又移时,身躯重赘,刀孔渐阔;忽焉脱落,

四肢蠖屈。鬼又逐以见王。王命会计生平卖爵鬻名,枉法霸产,所得金钱几何。即有狩须人持筹握算,曰:"三百二十一万。"王曰:"彼既积来,还令饮去!"少间,取金钱堆阶上,如丘陵。渐入铁釜,熔以烈火。鬼使数辈,更以杓灌其口,流颐则皮肤臭裂,入喉则脏腑腾沸。生时患此物之少,是时患此物之多也!半日方尽。

王者令押去甘州为女。行数步, 见架上铁梁, 围可数尺, 绾 一火轮,其大不知几百由旬,焰生五采,火耿云霄。鬼挞使登轮。 方合眼跃登,则轮随足转,似觉倾坠,遍体生凉,开眸自顾。身 已婴儿,而又女也。视其父母,则悬鹑败絮。土室之中,瓢杖犹 存。心知为乞人子。日随乞儿托钵,腹辘辘不得一饱。着败衣, 风常刺骨。十四岁, 鬻与顾秀才备媵妾, 衣食粗足自给。而冢室 悍甚,日以鞭箠从事,辄用赤铁烙胸乳。幸良人颇怜爱,稍自宽 慰。东邻恶少年,忽逾垣来逼与私。乃自念前身恶孽,已被鬼责, 今那得复尔,干是大声疾呼,良人与嫡妇尽起,恶少年始窜去。 居无何, 秀才宿诸其室, 枕上喋喋, 方自诉冤苦。忽震厉一声, 室门大辟,有两贼持刀入,竟决秀才首,囊括衣物。闭伏被底, 不敢作声。既而贼夫, 乃喊奔嫡室。嫡大惊, 相与泣验。遂疑妾 以奸夫杀良人,因以状白刺史。刺史严鞫,竟以酷刑定罪案,依 律凌迟处死, 絷赴刑所。胸中冤气扼塞, 距踊声屈, 觉九幽十八 狱,无此黑暗也。

正悲号间,闻同游者呼曰:"兄梦魇耶?"豁然而寤,见老僧犹跏趺座上。同侣竞相谓曰:"日暮腹枵,何久酣睡?"曾乃惨淡

而起。僧微笑曰:"宰相之占验否?"曾益惊异,拜而请教。僧曰: "修德行仁,火坑中有青莲也。山僧何知焉。"曾胜气而来,不觉 丧气而返。台阁之想,由此淡焉。入山不知所终。

异史氏曰: "福善祸淫,天之常道。闻作宰相而欢然于中者, 必非喜其鞠躬尽瘁可知矣。是时方寸中,宫室妻妾,无所不有。 然而梦固为妄,想亦非真。彼以虚作,神以幻报。黄粱将熟,此 梦在所必有,当以附之《邯郸》之后。"

(《聊斋志异》)

张鸿渐

张鸿渐,永平人。年十八,为郡名士。时卢龙令赵某贪暴,人民共苦之。有范生被杖毙,同学忿其冤,将鸣部院,求张为刀笔之词,约其共事,张许之。妻方氏,美而贤,闻其谋,谏曰:"大凡秀才作事,可以共胜,而不可以共败:胜则人人贪天功,一败则纷然瓦解,不能成聚。今势力世界,曲直难以理定。君又孤,脱有反复,急难者谁也!"张服其言,悔之。乃婉谢诸生,但为创词而去。质审一过,无所可否。赵以巨金纳大僚,诸生坐结党被收。又追捉刀人。张惧,亡者。

至凤翔界,资斧断绝。日既暮,踟蹰旷野,无所归宿。歘睹小村,趋之。老媪方出阖扉,见生,问所欲为。张以实告,妪曰:"饮食床榻,此都小事;但家无男子,不便留客。"张曰:"仆亦

不敢过望,但容寄宿门内,得避虎狼足矣。"妪乃令入,闭门,授 以草荐。瞩曰:"我怜客无归,私容止宿,未明官早去,恐吾家小 娘子闻知,将便怪罪。"妪去,张倚壁假寐。忽有笼灯晃耀,见妪 导一女郎出。张急避暗处,微窥之,二十许丽人也。及门,见草 荐, 诘妪: 妪实告之。女怒曰:"一门细弱, 何得容纳匪人!"即 问:"其人焉往?"张惧,出伏阶下。女审诘邦族,色稍霁,曰: "幸是风雅士,不妨相留。然老奴竟不关白,此等草草,岂所以 待君子!"命妪引客入舍,俄顷,罗酒浆,品物精洁;既而设锦裀 于榻。张甚德之,因私询其姓氏。妪曰:"吾家施氏,太翁、夫人 俱谢世,止遗三女。适所见,长姑舜华也。"妪既去。张视几上有 《南华经》注,因取就枕上,伏榻翻阅。忽舜华推扉入。张释卷, 搜觅冠履, 女即榻上抚生曰: "无须, 无须!" 因近榻坐, 觍然曰: "妾以君风流才士,欲以门户相托,遂犯瓜李之嫌,得不相遐弃。 否?"张皇然不知所对,但云:"不敢相诳,小生家中固有妻耳。" 女笑曰:"此亦见君诚笃,顾亦不妨。既不嫌憎,明日当烦媒妁。" 言己、欲去。张探身挽之,女亦遂留。未曙即起,以金赠张,曰: "君持作临眺之资。向暮,官晚来,恐为傍人所窥。"张如其言, 早出晏归, 半年以为常。

一日,归颇早,至其处,村舍全无,不胜惊怪。方徘徊间,忽闻媪云: "来何早也!"一转盼则院落如故,身固已在室中矣,益异之。舜华自内出,笑曰:"君疑妾耶?实对君言:妾,狐仙也,与君固有宿缘。如必见怪,请即别。"张恋其美,亦安之。夜谓女曰:"卿既仙人,当千里一息耳。小生离家三年,念妻孥不去心,

能携我一归乎?"女似不悦,曰:"琴瑟之情,妾自分于君为笃, 君守此念彼,是相对绸缪者,皆妄也!"张谢曰:"卿何出此言? 谚云: '一日夫妻,百日恩义。'后日归而念卿,亦犹今日之念 彼也。设得新忘故,卿何取焉?"女乃笑曰:"妾有褊心:于妾, 愿君之不忘: 干人,愿君之忘之也。然欲暂归,此复何难,君家 固咫尺耳。"遂把袂出门,见道路昏暗,张逡巡不前。女曳之走, 无几时,曰:"至矣。君归,妾且去。"张停足细认,果见家门。 逾垝垣入, 见室中灯火犹荧。近以两指弹扉。内问为谁, 张具道 所来。内秉烛启关,真方氏也。两相惊喜,握手入帷。见儿卧床 上,慨然曰:"我去时儿才及膝,今身长如许矣!"夫妇依倚,恍 如梦寐。张历述所遭。问及讼狱,始知诸生有瘐死者,有远徙者, 益服妻之远见。方纵体入怀,曰:"君有佳偶,想不复念孤衾中有 零涕人矣!"张曰:"不念,胡以来也?我与彼虽云情好,终非同 类;独其恩义难忘耳。"方曰:"君以我何人也?"张审视,竟非 方氏, 乃舜华也。以手探川, 一竹夫人耳。大惭无语。女曰:"君 心可知矣!分当自此绝矣,犹幸未忘恩义,差足自赎。"

过二三日,忽曰:"妾思疾情怜人,终无意味。君日怨我不相送,今适欲至都,便道可以同去。"乃向床头取竹夫人共跨之,令闭两眸,觉离地不远,风声飕飕。移时,寻落。女曰:"从此别矣。"方将叮嘱,女去已渺。怅立少时,闻村犬鸣吠,苍茫中见树木屋庐,皆故里景物,循途而归。逾垣叩户,宛若前伏。方氏惊起,不信夫归,诘证确实,始挑灯呜咽而出。既相见,涕不可仰。张犹疑舜华之幻弄也;又见床卧一儿,一如昨夕,因笑曰: "竹夫人又携入耶?"方氏不解,变色曰:"妾望君如岁,枕上啼痕固

在也。甫能相见,全无悲恋之情,何以为心矣!"张察其情真,始 执臂唏嘘,具言其详。问讼案所结,并如舜华言。方相感慨,闻 门外有履声,问之不应。盖里中有恶少,久窥方艳,是夜自别村 归,遥见一人逾垣去,谓必赴淫约者,尾之而入。甲故不甚识张, 但伏听之。及方氏亟问,乃曰:"室中何人也?"方讳言:"无之。" 甲言:"窃听已久,敬将执奸耳。"方不得已,以实告。甲曰:"张 鸿渐大案未消,即使归家,亦当缚送官府。"方苦哀之,甲词益狎 逼。张忿火中烧,把刀直出,剁甲中颅。甲仆,犹号;又连剁之, 遂死。方曰:"事已至此,罪益加重。君速逃,妾请任其辜。"张 曰:"丈夫死则死耳,焉能辱妻累子以求活耶!卿无顾虑,但令此 子勿断书香,目即暝矣。"天明,赴县自首。赵以钦案中人,姑薄 惩之。

寻由郡解都,械禁颇苦。途中遇女子跨马过,一老妪捉鞚,盖舜华也。张呼妪欲语,泪随声堕。女返辔,手启障纱,讶曰:"表兄也,何至此?"张略述之。女曰:"依兄平昔,便当掉头不顾;然予不忍也。寒舍不远,即邀公役同临,亦可少助资斧。"从去二三里,见一山村,楼阁高整。女下马入,令妪启舍延客。既而酒炙丰美,似所夙备。又使妪出曰:"家中适无男子,张官人即向公役多劝数觞,前途倚赖多矣。遣人措办数十金,为官人作费,兼酬两客,尚未至也。"二役窃喜,纵饮,不复言行。日渐暮,二役径醉矣。女出,以手指械,械立脱;曳张共跨一马,驶如飞。少时,促下,曰:"君止此。妾与妹有青海之约,又为君逗留一晌,久劳盼注矣。"张问:"后会何时?"女不答。再问之,推堕马下

而去。

既晓,问其地,太原也。遂至郡,赁屋授徒焉。托名宫子迁。居十年,访知捕亡浸怠,乃复逡巡东向。既近里门,不敢遽入,俟夜深而后入。及门,则墙垣高固,不复可越,只得以鞭挝门。久之,妻始出问。张低语之。喜极,纳入,作呵叱声,曰:"都中少用度,即当早归,何得遣汝半夜来?"入室,各道情事,始知二役逃亡未返。言次,帘外一少妇频来,张问伊谁,曰:"儿妇耳。"问。"儿安在?"曰:"赴都大比未归。"张涕下曰:"流离数年,儿已成立,不谓能继书香,卿心血殆尽矣!"话未已,子妇已温酒炊饭,罗列满几。张喜慰过望。居数日,隐匿房榻,惟恐人知。

一夜,方卧,忽闻人语腾沸,捶门甚厉。大惧,并起。闻人言曰:"有后门否?"益惧,急以门扇代梯,送张度垣而出,然后诣门问故,乃报新贵也。方大喜,深悔张遁,不可追挽。张是夜越莽穿榛,急不择途;及明,困殆已极。初念本欲向西,问之途人,则去京都通衢不远矣。遂入乡村,意将质衣而食,见一高门,有报条粘壁上,近视,知为许姓新孝廉也。顷之,一翁自内出,张迎揖而告以情。翁见仪貌都雅,知非赚食者,延入相款,因诘所往。张托言:"设帐都门,归途遇寇。"翁留诲其少子。张略问官阀,乃京堂林下者;孝廉,其犹子也。月余,孝廉偕一同榜归,云是永平张姓,十八九少年也。张以乡、谱俱同,暗中疑是其子;然邑中此姓良多,姑默之。至晚解装,出"齿录",急借披读,真子也,不觉泪下。共惊问之。乃指名曰:"张鸿渐,即我是也。"备言其由。张孝廉抱父大哭。许叔侄慰劝,始收悲以喜。许即以金帛函字,致各宪台,父子乃同归。

方自闻报,日以张在亡为悲;忽白孝廉归,感伤益痛。少时,父子并入,骇如天降。询知其故,始共悲喜。甲父见其子贵,祸心不敢复萌。张益厚遇之,又历述当年情状,甲父感愧,遂相交好。

(《聊斋志异》)

促织

宣德间,宫中尚促织之戏,岁征民间。此物故非西产,有华 阴令欲媚上官,以一头进,试使斗而才,因责常供。令以责之里 正。市中游侠儿,得佳者笼养之,昂其值,居为奇货。里胥猾黠, 假此科敛丁口,每责一头,辄倾数家之产。

邑有成名者,操童子业,久不售。为人迂讷,遂为猾胥报充里正役,百计营谋不能脱。不终岁,薄产累尽。会征促织,成不敢敛户口,而又无所赔偿,忧闷欲死。妻曰:"死何裨益?不如自行搜觅,冀有万一之得。"成然之。早出暮归,提竹筒、铜丝笼,于败堵丛草处,探石发穴,靡计不施,迄无济。即捕得三两头,又劣弱不中于款。宰严限追比,旬余,仗至百,两股间浓血流离,并虫亦不能行捉矣。转侧床头,惟思自尽。

时村中来一驼背巫,能以神卜。成妻具资诣问,见红女白婆,填塞门户。入其舍,则密室垂帘。帘外设香几。问者 香于鼎,再拜。巫从旁望空代祝,唇吻翕辟,不知何词。各各竦立以听。

少间,帘内掷一纸出,即道人意中事,无毫发爽。成妻纳钱案上,焚拜如前人。食顷,帘动,片纸抛落。视之,非字而画:中绘殿阁,类兰若;后小山下怪石乱卧,针针丛棘,青麻头伏焉;旁一蟆,若将跳舞,展玩不可晓。然睹促织,隐中胸怀,摺藏之,归以示成。成反复自念:"得无教我猎虫所耶?"细瞻景状,与村东大佛阁逼似。乃强起扶杖,执图诣寺后。有古陵蔚起,循陵而走,见蹲石鳞鳞,俨然类画。遂于蒿莱中,侧后徐行,似寻针芥,而心目耳力俱穷,绝无踪响。冥搜未已,一癞头蟆猝然跃去。成益愕,急逐趁之,蟆入草间。蹑迹披求,见有虫伏棘根。遽捕之,入石穴中,掭以尖草,不出,以筒水灌之,始出,状极俊健。逐而得之,审视,巨身修尾,青项金翅。大喜,笼归,举家庆贺,虽连城拱壁不啻也。土于盆而养之,蟹白栗黄,备极护爱。留待限期,以塞官责。

成有子九岁,窥父不在,窃发盆。虫跃掷径出,迅不可捉。 及扑入手,已股落腹裂,斯须就毙。儿惧,啼告母。母闻之,面 色灰死,大骂曰:"业根!死期至矣!而翁归,自与汝覆算耳!" 儿涕而出。未几成归,闻妻言,如被冰雪,怒索儿,儿渺然不知 所往。既得其尸于井,因而化怒为悲,抢呼欲绝。夫妻向隅,茅 舍无烟,相对默然,不复聊赖。日将暮,取儿槀葬,近抚之,气 息惙然,喜置榻上,半夜复苏。夫妻心稍慰。但儿神气痴木,奄 奄思睡。成顾蟋蟀笼虚,则气断声吞,亦不复以儿为念。自昏这 曙,目不交睫。

东羲既驾,僵卧长愁。忽闻门外虫鸣,惊起觇视,虫宛然尚在。喜而捕之,一鸣辄跃去,行且速。覆之以掌,虚若无物,手

才举,则又超忽而跃。急趁之,折过墙隅,迷其所往。徘徊四顾, 见虫伏壁上, 审谛之, 短小, 黑赤色, 顿非前物。成以其小, 劣 之。惟徬徨瞻顾, 寻所逐者。壁上小虫, 忽跃落襟袖间。视之, 形若土狗,梅花翅,方首长胫,意似良。喜而收之,将献公堂, 惴惴恐不当意, 思试之斗以觇之。村中少年好事者, 驯养一虫, 自名"蟹壳青"。日与子弟角,无不胜。欲居之以为利,而高其值, 亦无售者。径造庐访成。视成所蓄, 掩口胡卢而笑。因出己虫, 纳比笼中。成视之,庞然修伟,自增惭怍,不敢与较。少年固强 之。顾念蓄劣物终无所用,不如拚搏一笑,因合纳斗盆。小虫伏 不动,蠢若木鸡。少年又大笑。试以猪鬣毛撩拨虫须,仍不动。 少年又笑。屡撩之, 虫暴怒, 直奔, 遂相腾击, 振奋作声。俄见 小虫跃起, 张尾伸须, 直龁敌领。少年大骇, 解令休止。虫翘然 矜鸣,似报主知。成大喜。方共瞻玩,一鸡瞥来,径进以啄。成 骇立愕呼。幸啄不中, 虫跃去尺有咫, 鸡健进, 逐逼之, 虫已在 爪下矣。成仓卒莫知所救,顿足失色。旋见鸡伸颈摆扑,临视, 则虫集冠上,力叮不释。成益惊喜,掇置笼中。

翌日进宰,宰见其小,怒诃成。成述其异,宰不信。试与他虫斗,虫尽靡,又试之以鸡,果如成言。乃赏成。献诸抚军。抚军大悦,以金笼进上,细疏其能。即入宫中,举天下所贡蝴蝶、螳螂、油利挞、青丝额,……一切异状,遍试之,无出其右者。每闻琴瑟之声,则应节而舞。益奇之。上大嘉悦,诏赐抚臣名马衣缎。抚军不忘所自,无何,宰以"卓异"闻。宰悦,免成役,又嘱学使,俾入邑庠。复岁余,成子精神复旧,自言:"身化促织,

轻捷善斗,今始苏耳。"抚军亦厚赍成。不数岁,田百顷,楼阁万椽,牛羊蹄躈各千计。一出门,裘马过世家焉。

异史氏曰:"天子偶用一物,未必不过此已忘,而奉行者即为定例。加以官贪吏虐,民日贴妇卖儿,更无休止。故天子一跬步,皆关民命,不可忽也。独是成氏子以蠹贫,以促织富,裘马扬扬。当其为里正,受扑责时,岂意其至此哉!天将以酬长厚者,遂使抚臣、令尹,并受促织恩荫。闻之:一人飞升,仙及鸡犬。信夫!"(《聊斋志异》)

黄英

马才子,顺天人。世好菊,至才尤甚。闻有佳种,必购之, 千里不惮。一日,有金陵客寓其家,自言其中表亲有一二种,为 北方所无。马欣动,即刻治装,从客至金陵。客多方为之营求, 得两芽,裹藏如宝。归至中途,迂一少年,跨蹇从油碧车,丰姿 洒落。渐近与语。少年自言陶姓,谈言骚雅。因问马所自来,实 告之。少年曰:"种无不佳,培溉在人。"因与论艺菊之法。马大 悦,问:"将何往?"答云:"姊厌金陵,欲卜居于河朔耳。"马欣 然曰:"仆虽固贫,茅庐可以寄榻。不嫌荒陋,无烦他适。"陶趋 车前,向姊咨禀。车中人推帘语,乃二十许绝世美人也。顾弟言: "屋不厌卑,而院宜得广。"马代诺之,遂与俱归。

第南有荒圃, 仅小室三四椽, 陶喜居之; 日过北院, 为马治

菊。菊已枯,拔根再植之,无不活。然家清贫,陶日与马共饮食, 而察其家似不举火,马妻吕,亦爱陶姊,不时以升斗馈恤之。陶 姊小字黄英,雅善谈,辄过吕所,与共纫绩。

陶一日谓马曰:"君家固不丰,仆日以口腹累知交,胡可为常。 为今计,卖菊亦足谋生。"马素介,闻陶言,甚鄙之,曰:"仆以 君风流高士, 当以安贫: 今作是论, 则以东篱为市井, 有辱黄花 矣。"陶笑曰:"自食其力不为贪,贩花为业不为俗。人固不可苟 求富,然亦不必务求贫也。"马不语,陶起而出。自是,马所弃残 枝劣种, 陶悉掇拾而去。由此不复就马寝食, 招之始一至。未几, 菊将开,闻其门嚣喧如市。怪之,过而窥焉,见市人买花者,车 载肩负,道相属也。其花皆异种,目所未睹。心厌其贫,欲与绝; 而又恨其私秘佳本,遂款其扉,将就诮让。陶出,握手曳入。见 荒庭半亩皆菊畦,数椽之外无旷土。劚去者,则折别枝插补之; 其蓓蕾在畦者, 罔不佳妙: 而细认之, 皆向所拔弃也。陶入室, 出席馔,设席畦侧,曰:"仆贫不能守清戒,连朝幸得微资,颇足 供醉。"少间,房中呼"三郎",陶诺而去。俄献佳肴,烹饪良精。 因问:"贵姊何以不字?"答云:"时未至。"问:"何时?"曰:"四 十三月。"又诘:"何说?"但笑不言。尽欢始散。过宿,又诣之, 新插者已盈尺矣。大奇之, 苦求其术。陶曰:"此固非可言传; 且 君不以谋生,焉用此?"

又数日,门庭略寂,陶乃以蒲席包菊,捆载数车而去。逾岁, 春将半,始载南中异卉而归,于都中设花肆,十日尽售,复归艺 菊。问之去年买花者,留其根,次年尽变而劣,乃复购于陶。陶

由此日富:一年增舍,二年起厦屋。兴作从心,更不谋诸主人。 渐而旧日花畦,尽为廊舍。更于墙外买田一区,筑塘四周,悉种 菊。至秋,载花去,春尽不归。而马妻病卒。意属黄英,微使人 风示之。黄英微笑,意似允许,惟专候陶归而已。年余,陶竟不 至。黄英课仆种菊,一如陶。得金益合商贾,村外治膏田二十顷, 甲第益壮。忽有客自东粤来,寄陶函信,发之,则嘱姊归马。考 其寄书之日,即妻死之日:回忆园中之饮,适四十三月也,大奇 **之。以书示英,请问致聘何所。英辞不受采,又以故居陋,欲使** 就南第居,若赘焉。马不可,择日行亲迎礼。黄英既适马,于壁 间开扉通南第, 日过课其仆。马耻以妻富, 恒嘱黄英作南北籍, 以防淆乱。而家所需,黄英辄取诸南第。不半岁,家中触类皆陶 家物。马立遣人一一赍还之,戒勿复取。未浃旬,又杂之。凡数 更, 马不胜烦。黄英笑曰:"陈仲子毋乃劳乎?"马惭, 不复稽, 一切听诸黄英。鸩工庀料, 土木大作, 马不能禁。经数月, 楼舍 连亘,两第竟合为一,不分疆界矣。然遵马教,闭门不复业菊, 而享用过于世家。马不自安,曰:"仆三十年清德,为卿所累。今 视息人间,徒依裙带而食,真无一毫丈夫气矣。人皆视富,我但 祝穷耳!"黄英曰:"妾非贪鄙:但不少致丰盈,遂令千载下人, 谓渊明贫贱骨,百世不能发迹,故聊为我家彭泽解嘲耳。然贫者 愿富,为难:富者求贫,固亦甚易。床头金任君挥去之,妾不靳 也。"马曰:"捐他人之金,抑亦良丑。"黄英曰:"君不愿富,妾 亦不能贫也。无已,析君居:清者自清,浊者自浊,何害。"乃于 园中筑茅茨, 择美婢往侍马。马安之。然过数日, 苦念黄英。招 之,不肯至:不得已,反就之。隔宿辄至,以为常。黄英笑曰: "东

食西宿,廉者当不如是。"马亦自笑,无以对,遂复合居如初。

会马以事客金陵,适逢菊秋。早过花肆,见肆中盆列甚繁, 款朵佳胜,心动,疑类陶制。少间,主人出,果陶也。喜极,具 道契阔,遂止宿焉。马邀之归。陶曰:"金陵,吾故土,将婚于是。 积有薄资,烦寄吾姊。我岁杪当暂去。"马不听,请之益苦。且曰: "家幸充盈,但可坐享,无须复贾。"坐肆中,使仆代论价,廉其 值,数日尽售。逼促囊装,赁舟遂北。入门,则姊已陈舍,床榻 桫褥皆设,若预知弟也归者。

陶自归,解装课役,大修亭园,惟日与马共棋酒,更不复结一客。为之择婚,辞不愿。姊遣两婢侍其寝处,居三四年,生一女。陶饮素豪,从不见其沉醉。有友人曾生,量亦无对。适过马,马使与陶相较饮。二人纵饮甚欢,相得恨晚,自辰以讫四漏,计各尽百壶。曾烂醉如泥,沉睡座间。陶起归寝,出门践菊畦,玉山倾倒,委衣于侧,即地化为菊,高如人;花十余朵,皆大于拳。马骇绝,告黄英。英急往,拔置地上,曰:"胡醉甚此!"覆以衣,

邀马俱去,戒勿视。既明日而往,则陶卧畦边。马乃悟姊弟皆菊精也,益爱敬之。而陶自露迹,饮益放,恒目折简招曾,因与莫逆。值花朝,曾来造访,以两仆舁药浸白酒一坛,约与共尽。坛将竭,二人犹未甚醉。马潜以一瓻续入之,二人又尽之。曾醉已惫,诸仆负之以去。陶卧地,又化为菊。马见惯不惊,如法拔之,守其旁以观其变。久之,叶益憔悴。大惧,始告黄英。英闻骇曰:"杀吾弟矣!"奔视之,根株已枯。痛绝,掐其梗,埋盆中,携入闺中,日灌溉之。马悔恨欲绝,甚怨曾。越数日,闻曾已醉

死矣。

盆中花渐萌,九月既开,短干粉朵,嗅之有酒香,名之:"醉陶",浇以酒则茂。后女长成,嫁于世家。黄英终老,亦无他异。

异史氏曰:"清山白云人,遂以醉死,世尽借之,而未必不自以为快也。植此种于庭中,如见良友,如对丽人,——不可不物色之也。"

(《聊斋志异》)

小翠

王太常,越人。总角时,昼卧榻上。忽阴晦,巨霆暴作。一物大于猫,来伏身下,展转不离。移时晴霁,物即径去。视之,非猫,始怖,隔房呼兄。兄闻喜曰:"弟必大贵,此狐来避雷霆劫也。"后果少年登进士,以县令入为侍御。生一子,名元丰,绝痴,十六岁不能知牝牡,因而乡党无与为婚。王忧之。适有妇人率少女登门,自请为妇。视其女,嫣然展笑,真仙品也。喜问姓名。自言:"虞氏。女小翠,年二八矣。"与仪聘金。曰:"是从我糠覈不得饱,一旦置身广厦,役婢仆,餍膏粱,彼意适,我愿慰矣。岂卖菜也,而索值乎!"夫人大悦,优厚之。妇即命女拜王及夫人,嘱曰:"此尔翁姑,奉侍宜谨。我大忙,且去,三数日当复来。"王命仆马送之。妇言:"里巷不远,无烦多事。"遂出门去。小翠殊不悲恋,便即奁中翻取花样。夫人亦爱乐之。数日,妇不至,

以居里问女,女亦憨然不能言其道路。遂治别院,使夫妇成礼, 诸戚闻拾得贫家儿作新妇,共笑姗之;见女皆惊,群议始息。

女又甚慧, 能窥翁姑喜怒。王公夫妇, 宠惜过于常情, 然惕 惕焉惟恐其憎子痴; 而女殊欢笑, 不为嫌。第善谑, 刺布作园, 踏蹴为笑。着小皮靴, 蹴去数十步, 绐公子奔拾之, 公子及婢恒 流汗相属。一日,王偶过,圆轰然来,直中尔目。女与婢俱敛迹 去,公子犹踊跃奔逐之。王怒,投之以石,始伏而啼。王以状告 夫人: 夫人往责女, 女惟俯首微笑, 以手刓床。既退, 憨跳如故, 以脂粉涂公子作花面如鬼。夫人见之,怒甚,呼女诟骂。女倚几 弄带,不惧,亦不言。夫人无奈之,因杖其子。元丰大号,女始 色变, 屈膝乞宥。夫人怒顿解, 释杖去。女笑拉公子入室, 代扑 衣上尘, 拭眼泪, 摩挲杖痕, 饵以枣栗。公子乃收涕以欣。女阖 庭户,复装公子作霸王,作沙漠人;己乃艳服,束细腰,扮虞美 人,婆婆作帐下舞,或髻插雉尾,拨琵琶,铮铮缕缕然,喧笑一 室, 日以为常。王公以子痴, 不忍过责妇: 即微闻焉, 亦若置之。 同巷有王给谏者,相隔十余户,然素不相能:时值三年大计 吏, 忌公握河南道篆, 思中伤之。公知其谋, 忧虑无所为计。一 夕, 早寝, 女冠带, 饰冢宰状, 剪素丝作浓髭, 又以青衣饰两婢 为虞候, 窃跨厩马而出, 戏云:"将谒王先生。"驰至给谏之门, 即又以鞭挞从人,大言曰:"我谒侍御王,宁谒给谏王耶!"回辔 而归。比至家门,门者误以为真,奔白王公。公急起承迎,方知 为子归之戏。怒甚,谓夫人曰:"人方蹈我之瑕,反以闺阁之丑登

门而告之,余祸不远矣!"夫人怒,奔女室,诟让之。女惟憨笑,

并不一置词。挞之,不忍;出之,则无家:人妻懊怨,终夜不寝。时冢宰某公赫甚,其仪采服从,与女伪装无少殊别,王给谏亦误为真。屡侦公门,中夜而客未出,疑冢宰与公有阴谋。次日早朝,见而问曰:"昨夜相公至君家耶?"公疑其相讥,惭颜唯唯,不甚响答。给谏愈疑,谋遂寝,由此益交欢公。公探知其情,窃喜,而阴嘱夫人,劝夫改行;女笑应之。

逾岁,首相免,适有以私函致公者,误投给谏。给谏大喜, 先托善公者往假万金, 公拒之。给谏自诣公所。公觅巾袍, 并不 可得:给谏伺候久,怒公慢,愤将行。忽见公子兖衣旒冕,有女 子自门内推之以出。大骇;已笑而抚之,脱其服冕, 之而去。 公急出,则客去已远。闻其故,惊颜如土,大哭曰:"此祸水也! 指日赤吾族矣!"与夫人操杖往。女已知之,阖扉任其诟厉。公怒, 斧其门。女在内含笑而告之曰:"翁无烦怒!有新妇在,刀锯斧钺, 妇自受之,必不令贻害双亲。翁若此,是欲杀妇以灭口耶?"公 乃止。给谏归, 果抗疏揭王不轨, 衮冕作据。上惊验之, 其旒冕 乃粱秸心所制,袍则败布黄袱也。上怒其诬。又召元丰至,见其 憨状可掬, 笑曰:"此可以作天子耶?"乃下之法司。给谏又讼公 家有妖人, 法司严诘臧获, 并言无他, 惟颠妇痴儿, 日事戏笑: 邻里亦无异词。案乃定,以给谏充云南军。王由是奇女。又以母 久不至, 意其非人。使夫人探诘之, 女但笑不言。再复穷问, 则 掩口曰:"儿玉皇女,母不知耶?"

无何,公擢京卿。五十余,每患无孙。女居三年,夜夜与公子异寝,似未尝有所私。夫人舁榻去,嘱公子与妇同寝。过数日,公子告母曰:"借榻去,悍不还!小翠夜夜以足股加腹上,喘气不

得;又惯掐人股里。"婢妪无不粲然。夫人呵后令去。一日,女浴于室,公子见之,欲与偕;女笑止之,谕使姑待。既出,乃更泻热汤于瓮,解其袍裤,与婢扶入之。公子觉蒸闷,大呼欲出。女不听,以衾蒙之。少时,无声,启视,已绝。女坦笑不惊,曳置床上,拭体干洁,加复被焉。夫人闻之,哭而入,骂曰:"狂婢何杀吾儿!"女冁然曰:"如此痴儿,不如勿有。"夫人益恚,以首触女;婢辈争曳劝之。方纷噪间,一婢告曰:"公子呻矣!"夫人辍涕抚之,则气息休休,而大汗浸淫,沾浃裀褥。食顷,汗已,忽开目四顾,遍视家人,似不相识,曰:"我今回忆往昔,都如梦寐,何也?"夫人以其言不痴,大异之。携参其父,屡试之,果不痴。大喜,如获异宝。至晚,还榻故处,更设衾枕以觇之。公子入室,尽遣婢去。早窥之,则榻虚设。自此痴颠皆不复作,而琴瑟静好,如形影焉。

年余,公为给谏之党奏劾免官,小有诖误。旧有广西中丞所赠玉瓶,价累千金,将出以贿当路。女爱而把玩之,失手堕碎,惭而自投。公夫妇方以免官不快,闻之,怒,交口呵骂。女忿而出,谓公子曰:"我在汝家,所保全者不止一瓶,何遂不少存面目?实与君言:我非人也。以母遭雷霆之劫,深受尔翁庇翼;又以我两人有五年夙分,故以我来报曩恩、了夙愿耳。身受唾骂,擢发不足以数,所以不即行者,五年之爱未盈,今何可以暂止乎!"盛气而出,追之已查。公爽然自失,而悔无及矣。

公子入室,睹其剩粉遗钗,恸哭欲死;寝食不甘,日就赢悴。 公大忧,急为胶续以解之,而公子不乐,惟求良工画小翠象,日

夜浇祷其下, 几二年, 偶以故自他里归, 明月已皎, 村外有公家 亭园, 骑马经墙外过, 闻笑语声, 停辔, 使厩卒捉鞚, 登鞍以望, 则二女郎游戏其中。云月昏蒙,不甚可辨。但闻一翠衣者曰:"婢 子当逐出门!"一红衣者曰:"汝在吾家园亭,反逐阿谁?"翠衣 人曰:"婢子不羞!不能作妇,被人驱遣,犹冒认物产耶?"红衣 者曰:"索胜老大婢无主顾者!"听其音,酷类小翠,疾呼之。翠 衣人去曰:"姑不与若争,汝汉子来矣。"既而红衣人来,果小翠。 喜极。女令登垣,承接而下之,曰:"二年不见,瘦骨一把矣!" 公子握手泣下,具道相思。女言:"妾亦知之,但无颜复见家人。 今与大姊游戏,又相邂逅,足知前因不可逃也。"请与同归,不可: 请止园中,许之。公子遣仆奔白夫人。夫人惊起,驾肩舆而往。 启钥入亭, 女即趋下迎拜。夫人捉臂流涕, 力白前过, 几不自容, 曰:"若不少记榛梗,请偕归,慰我迟暮。"女峻辞不可。夫人虑 野亭荒寂,谋以多人服役。女曰:"我诸人悉不愿见,惟前两婢朝 夕相从,不能无眷注耳。外惟一老仆应门,余都无所复须。"夫人 悉如其言。托公子养疴园中,日供食用而已。

女每劝公子婚,公子不从。后年余,女眉目音声,渐与曩异,出象质之,迥若两人。大怪之。女曰:"视妾今日,何如畴昔美?"公子曰:"今日美则美,然较昔则似不如。"女曰:"意妾老矣!"公子曰:"二十余岁人,何得速老。"女笑而焚图,救之已烬。

一日,谓公子曰:"昔在家时,阿姑谓妾抵死不作茧。今亲老君孤,妾实不能产育,恐误君宗嗣。请娶归于家,旦晚侍奉翁姑,君往来于两间,亦无所不便。"公子然之,纳币于钟太史之家。吉期将近,女为新人制衣履,赍送母所。及新人入门,则言貌举止,

与小翠无毫发之异。大奇之。往至园亭,则女已不知所在。问婢,婢出红巾曰:"娘子暂归宁,留此贻公子。"展巾,则结玉玦一枚,心知其不返,遂携婢俱归。虽顷刻不忘小翠,幸而对新人如觌旧好焉。始悟钟氏之姻,女预知之,故先化其貌,以慰他日之思云。

异史氏曰:"一孤也,以无心之德,而犹思所报;而身受再造之福者,顾失声于破甑,何其鄙哉!月缺重圆,从容而去,始知仙人之情,亦更深于流俗也!"

(《聊斋志异》)

聂小倩

宁采臣,浙人。性慷爽,廉隅自重。每对人言:"生平无二色。" 适赴金华,至北郭,解装兰若。寺中殿塔壮丽,然蓬蒿没人,似 绝行踪。东西僧舍,双扉虚掩,唯南一小舍,扃键如新。又顾殿 东隅,修竹拱把,阶下有巨池,野藕已花。意乐其幽杳。会学使 案临,城舍价昂,思便留止,遂散步以待僧归。日暮,有士人来, 启南扉。宁趋为礼,且告以意。士人曰:"此间无房主,仆亦侨居。 能甘荒落,旦晚惠教,幸甚!"宁喜,藉蒿代床,支板作几,为久 客计。是夜,月明高洁,清光似水。二人促膝殿廊,各展姓字。 士人自言:"燕姓,字赤霞。"宁疑为赴试诸生,而听其音声,殊 不类浙。

诘之, 自言: "秦人。"语甚朴诚, 既而相对词竭, 遂拱别归

寝。

宁以新居,久不成寐。闻舍北喁喁,如有家口。起伏北壁石 窗下,微窥之,见短墙外一小院落,有妇可四十余,又一媪衣■ 排,插蓬沓,鲐背龙钟,偶语月下。妇曰:"小倩何久不来?"媪 曰:"殆好至矣。"妇曰:"将无向姥姥有怨言否?"曰:"不闻。 但意似蹙蹙"。妇曰:"婢子不宜好相识。"言未已,有一十七八妇 子来, 仿佛艳绝。媪笑曰:"背地不言人。我两正谈道, 小妖婢悄 来无迹响,幸不訾着短处。"又曰:"小娘子端好是画中人,遮莫 老身是男子,也被摄魂去。"女曰:"姥姥不相誉,更阿谁道好?" 妇人女子又不知何言。宁意其邻人眷口,寝不复听。又许时,始 寂无声。方将睡去,觉有人至寝所,急起审顾,则北院女子也。 惊问之。女笑曰:"月夜不寐,愿修燕好。"宁正容曰:"卿防物议, 我畏人言。略一失足,廉耻道丧。"女云:"夜无知者。"宁又咄之。 女逡巡若复有词。宁叱:"速去!不然,当呼南舍生知。"女惧, 乃退。至户外复返,以黄金一锭置褥上。宁掇掷庭墀曰:"非义之 物,污吾囊橐!"女惭出,拾金自言曰:"此汉当是铁石。"

诘旦,有兰溪生携一仆来候试,寓于东厢,至夜暴亡。足心有小孔,如锥刺者,细细有血出。俱莫知故。经宿,仆亦死,症亦如之。向晚,燕生归,宁质之,燕以为魅。宁素抗直,颇不在意。宵分,女子复至,谓宁曰:"妾阅人多矣,未有刚肠如君者。君诚圣贤,妾不敢欺。小倩,姓聂氏,十八夭殂,葬寺侧。辄被妖物威胁,历役贱务,腆颜向人,实非所乐。今寺中无可杀者,恐当以夜叉来。"宁骇求计。女曰:"与燕生同室可免。"问:"何不惑燕生?"曰:"彼奇人也,固不敢近。"问:"迷人若何?""曰:

"狎昵我者,隐以锥刺其足,彼即茫若迷,因摄血以供妖饮;又或以金,非金也,乃罗刹鬼骨,留之,能截取人心肝:二者,凡以投时好耳。"宁感谢,问戒备之期,答以明宵。临别,泣曰:"妾堕玄海,求岸不得。郎君义气干云,必能拔生救苦。倘肯囊妾朽骨,归葬安宅,不啻再造。"宁毅然诺之,因问葬处。曰:"但记取白杨之上有乌巢者是也。"言己出门,纷然而灭。

明日,恐燕他出,早诣邀至。辰后具酒馔,留意察燕。既约同宿,辞以性癖耽寂。宁不听,强携卧具来,燕不得已,移榻从之。嘱曰:"仆知足下丈夫,倾风良切,要有微衷,难以遽白。幸忽翻窥箧褛,违之,两俱不利。"宁谨受教。既而各寝。燕以箱箧置窗上,就枕移时,齁如雷吼。宁不能寐。近一更许,窗外隐隐有人影。俄而近窗来窥,目光睒闪。宁惧,方欲呼燕,忽有物裂箧而出,耀若匹练,触折窗上石棂,歘然一射,即遽敛入,宛如电灭。燕觉而起,宁伪睡以觇之。燕捧箧检取一物,对月嗅视,白光晶莹,长可二寸,径韭叶许。已而数重包固,仍置破箧中。自语曰:"何物老魁,直尔大胆,致坏箧子。"遂复卧。宁大奇之,因起问之,且告以所见。燕见: "既相知爱,何敢深隐。我,剑客也。若非石棂,妖当立毙。虽然,亦伤。"问:"所缄何物?"曰:"剑也。适嗅之,有妖气。"宁欲观之,慨出相示,荧荧然一小剑也。于是益厚重燕。

明日,视窗外有血迹。遂出寺北,见荒坟累累,果有白杨, 乌巢其颠。迨营谋既就,促装欲归。燕生设祖帐,情义殷渥。以 破革囊赠宁,曰:"此剑袋也,宝藏可远魑魅。"宁欲从受其术,

曰:"如君信义刚直,可以为此:然君犹富贵中人,非此道中人也。" 宁乃托有妹葬此,发掘女骨,敛以衣衾,凭舟而归。宁斋临野, 因营坟,葬诸斋外。祭而祝曰:"怜卿孤魂,葬近蜗居,歌哭相闻, 庶不见凌于雄鬼。一瓯浆水饮,殊不清旨,幸不为嫌。"祝毕而返, 后有人呼曰:"缓待同行!"回顾,则小倩也,欢喜谢曰:"君信义, 十死不足以报。请从归,拜识姑嫜,媵御无悔。"审谛之,肌映流 霞,足翘细笋,白昼端相,娇艳尤绝。遂与俱至斋中。嘱坐少待, 先入白母。母愕然。时宁妻久病,母戒毋言,恐所惊骇。言次, 女已翩然入,拜伏地下。宁曰:"此小倩也。"母惊顾不遑。女谓 母曰:"儿飘然一身,远父母兄弟。蒙公子露覆,泽被发肤,愿执 箕帚,以报高义。"母见其绰约可爱,始敢与言,曰:"小娘子惠 顾吾儿,老身喜不可已。但生平止此儿,用承祧绪,不敢令有鬼 偶。"女曰:"儿实无二心。泉下人既不见信于老母,请以兄事, 依高堂,奉晨昏,如何?"母怜其诚,允之。即欲拜嫂,母辞以 疾, 乃止。女即入厨下, 代母尸饔。入房穿户, 似熟居者, 日暮, 母畏惧之,辞使归寝,不为设床褥。女窥知母意,即意去。达斋 欲入,却退,徘徊户外,似有所惧。生呼之,女曰:"室中剑气畏 人,向道途之不奉见者,良以此故。"宁悟为草囊,取悬他室。女 乃入,就烛下坐,移时,殊不一语。久之,问:"夜读否?妾少诵 《椤严经》,今强半遗忘,浼求一卷,夜暇就兄正之。"宁诺。又 坐,默然。二更向尽,不言去。宁促之。愀然曰:"异域孤魂,殊 怯荒墓。"宁曰:"斋中别无床寝,且兄妹亦宜远嫌。"女起,容颦 蹙而欲啼, 足亻匡懹而懒步, 从容出门, 涉阶而没。宁窃怜之, 欲留宿别榻,又惧母嗔。女朝旦朝母,棒沃盥,下堂操作,无不

曲承母志。黄昏告退,辄过斋头,就烛诵经。觉宁将寝,始惨然去。

先是,宁妻病废,母劬不可堪。自得女,逸甚,心德之。日渐稔,亲爱如已出,竟忘其为鬼,不忍晚令去,留与同卧起。女初来,未尝饮食,半年,渐啜稀■。母子皆溺爱之,讳言其鬼,人亦不之辨也。无何,宁妻亡,母阴有纳女意,然恐于子不利。女微窥之,乘间告母曰:"居年余,当知儿肝膈。为不欲祸行人,故从郎君来。区区无他意,止以公子光明磊落,为天人所钦瞩,实欲依赞三数年,借博封诰,以光泉壤。"母亦知其无恶,但惧不能延宗嗣。女曰:"子女唯天所授。郎君注福籍,有亢宗子三,不以鬼妻而遂夺也。"母信之,与子议。宁喜,因列筵告戚党或请觌新妇,女慨然华妆出,一堂尽眙,反不疑其鬼,疑为仙。由是五党,诸内眷,咸执贽以贺,争拜识之。女善画兰梅,辄以尺幅酬答,得者藏什袭以为荣。

一日,俯颈窗前,悟怅若失。忽问:"革囊何在?"曰:"以卿畏之,故缄置他所。"曰:"妾受主气已久,当不复畏,宜取挂床头。"宁诘其意。曰:"三日来,心怔忡无停息。意金华妖物,恨妾远遁,恐旦晚寻及也。"宁果携革囊来。女反复审视,曰:"此剑仙将盛人头者也。敝败至此,不知杀人几何许。妾今日视之,肌犹粟栗。"乃悬之。次日,又命移悬户上。夜对烛坐,约宁勿寝。歘有一物,如飞鸟堕,女惊匿夹幕间。宁视之,物如夜叉状,电目血口,睒闪攫拏而前。至门却步,逡巡久之,渐近革囊,以爪摘取,似将抓裂。囊忽格然一响,大可合篑,恍惚有鬼物,突出

半身,揪夜叉入。声遂寂然,囊亦顿缩如故。宁骇诧,女亦出,大喜曰:"无恙矣!"共视囊中,清水数斗而已。

后数年,宁果登进士。女举一男。纳妾后,又各生一男,皆 仕进有声。

(《聊斋志异》)

红 玉

广平冯翁有一子,字相如。父子俱诸生。翁年近六旬,性方鲠,而家屡空。数年间,媪与子妇又相继逝,井臼自操之。一夜,相如坐月下,忽见东邻女自墙上来窥。视之,美;近之,微笑;招以手,不来亦不去;固请之,乃梯而过,遂共寝处。问其姓名,曰:"妾,邻女红玉也。"生大爱悦,与订永好,女诺之。夜夜往来。约半年许。翁夜起,闻子舍笑语,窥之,见女。怒,唤生出,骂曰:"畜生!所为何事!如此落寞,尚不刻苦,乃学浮荡耶?人知之,丧汝德;人不知,亦促汝寿!"生跪自投,泣言知悔,翁叱女曰: "女子不守闺戒,既自玷,而复玷人。倘事一发,当不仅贻寒舍羞!"骂已,愤然归寝,女流涕曰:"亲庭罪责,良足愧辱,我两人缘分尽矣。"生曰: "父在不得自专,卿如有情,尚当含垢为好。"女言辞决,生乃洒涕。女止之曰:"妾与君无媒妁之言、父母之命,逾墙钻隙,何能白首?此处有一佳偶,可聘也。"生告以贫。女曰:"来宵相俟,妾为君谋之。"次夜,女果至,出

白金四十两赠生。曰:"去此六十里,有吴村卫氏女,年十八矣, 高其价,故未售也。君重啖之,必合谐允。"言已,别去。

生乘间语父,欲往相之,而隐馈金,不敢告父。翁自度无资,以是故止之。生又婉言:"试可乃已",翁颔之。生遂假仆马,诣卫氏。卫故田舍翁,生呼出外,与间语。卫知生望族,又见仪采轩豁,心许之,而虑其靳于资。生听其词意吞吐,会其旨,倾囊陈几上。卫乃喜,浼邻生居间,书红笺而盟焉。生入拜媪。居室偪侧,女依母自障。微睨之,虽荆布之饰,而神情光艳,心窃喜。卫借舍款婿,便言:"公子无须亲迎,待少作衣妆,即合舁送去。"生与订期而归。诡告翁,言:"卫爱清门,不责资。"翁亦喜。至日,卫果送女至。妇勤俭,有顺德,琴瑟甚笃。逾二年,举一男,名福儿。

会清明,抱子登墓,遇邑绅宋氏。宋官御史,坐行赇,免居林下,大扇威虐。是日亦上墓归,见女,艳之。问村人,知为生配。料冯贫士,诱以重赂,冀可摇,使家人风示之。生骤闻怒形于色;既思势不敌,敛怒为笑。归告翁。翁大怒奔出,对其家人,指天划地,诟骂万端。家人鼠窜而去。宋氏亦怒。竟遣数人入生家,殴翁及子,汹若沸鼎。女闻之,弃儿于床,披发号救。群篡舁之,哄然便去。父子伤残,呻吟在地,儿呱呱啼室中。邻人共怜之,扶置榻上。经日,生杖而能起。翁忿不食,呕血,寻毙。生大哭抱子兴词,上至督抚,讼几遍,卒不得直。后闻妇不屈死,益悲冤塞胸吭,无路可伸。每思邀路刺杀宋,而虑其扈从繁,儿又罔托。日夜哀思,双睫为之不交。忽一丈夫吊诸其室,虬髯阔

颔,曾与无素。挽坐,欲问邦族。客遽曰:"君有杀父之仇,夺妻之恨,而忘报乎?"生疑为宋人之侦,姑伪应之。客怒,眦欲裂,遽出曰:"仆以君人也,今乃知不足齿之伦!"生察其异,跑而挽

之曰:"诚恐宋人 我。今实布腹心:仆之卧薪尝胆者,固有日矣,但怜此褓中物,恐坠宗祧。君义士,能为我桁臼否?"客曰:"此妇人女子之事,非所能。君所欲托诸人者,请自任之;所欲自任者,愿得而代疱焉。"生闻,崩角在地,客不顾而出。生追问姓字,曰:"不济,不任受怨;济,亦不任受德。"遂去。生惧祸及,抱子亡去。

至夜,宋家一门俱寝,有人越重垣入,杀御史父子三人,及 一媳一婢。宋家具状告官,官在骇。宋家执谓相如,于是遣役捕 生。生遁,不知所之,于是情益真。宋仆同官役诸冥搜,夜至南 山,闻儿啼,迹得之,系缧而行。儿啼愈嗔,群夺儿抛弃之。生 冤愤欲绝。见邑令,曰:"何杀人?"生曰: "冤哉!某以夜死, 我以昼出,且抱呱呱者,何能逾垣杀人?"令曰:"不杀人,何逃 乎?"生词穷,不能置辩,乃收诸狱。生曰:"我死无足惜,孤儿 何罪?"令曰:"汝杀人子多矣,杀汝子,何怨!"生既褫革,屡 受梏惨, 卒无词。今是夜方卧, 闻有物击床, 震震有声, 大惧而 号。举家惊起,集而烛之,一短刀,铦利如霜,剁床入木者寸余, 牢不可拔。令睹之,魂魄丧失。荷戈遍索,竟无踪迹。心窃馁。 又以宋人死, 无可畏惧, 乃详诸宪, 代生解免, 竟释生。生归, 瓮无升斗,孤影对四壁。幸邻人怜馈饮食,苟且自度。念大仇已 报,则冁然喜:思惨酷之祸,几于灭门,则泪潜潜堕:及思半生 贫彻骨, 宗支不续, 则于无人处大哭失声, 不复能自禁。如此半

年, 捕禁益懈, 乃哀邑令, 求判还卫氏之骨。既葬而归, 悲怛欲 死,辗转空床,竟无生路。忽有款门者,凝神寂听,闻一人在门 与小儿语。生急起窥觇,似一妇子。扉初启,便问:"大 外, 冤昭雪,可幸无恙?"其声稔熟,而仓卒不能追忆。烛之,则红 玉也。挽一小儿,嬉笑胯下。生不暇问,抱女呜哭。女亦惨然, 既而推儿曰:"汝忘尔父耶"儿牵女衣,目灼灼视生。细审之,福 儿也。大惊, 泣曰:"儿那得来?"女曰:"实告君, 昔言邻女者, 妄也。妾实狐。适宵行, 见儿啼谷中, 抱养于秦。闻大难已息, 故携来与君团聚耳。"生挥涕拜谢。儿在女怀,如依其母,竟不复 能识父矣。天未明,女即遽起。问之,答曰:"奴欲去。"生裸跪 床头, 涕不能仰。女笑曰:"妾诳君耳。今家道新创,非夙兴夜寐 不可。"乃剪莽拥篲,类男子操作。生忧贫乏,不能自给。女曰: "但请下帷读,勿问盈歉,或当不殍饿死。"遂出金治织具,租田 数十亩, 雇佣耕作。荷镵诛茅, 荦罗补屋, 日以为常。里党闻妇 贤, 益乐资助之。约半年, 人烟腾茂, 类素封家。生曰: "灰烬之 余,卿白手再造矣。然一事未就安妥,如何?"诘之,答云:"试 期已迫,巾服尚未复耳。"女笑曰:"妾前以四金寄广文,已复名 在案。若待君言,误之已久。"生益神之。是科遂邻乡荐。时年三 十六, 腴田连阡, 夏屋渠渠矣。女袅娜如随风飘去, 而操作类农 家妇, 虽严冬自苦, 而手腻如脂。自言二十八岁, 人视之, 常若 二十许人。

异史氏曰:"其子贤,其父德,故其报之也侠。非人侠,狐亦 侠也。遇亦奇矣!然官宰悠悠,竖人毛发,刀震震入木,何惜不 略移床上尺许哉? 使苏子美读之,必浮白曰: '惜乎!击之不中!'" (《聊斋志异》)

桃夭村

太仓蒋生,弱冠能文。从贾人泛海,飘至一处,山列如屏,川澄若画,四围绝无城郭,有桃树数万株,环若郡治。时值仲春,香风飘拂,数万株含苞吐蕊,仿佛锦围绣幄,排列左右。蒋大喜,偕贾人马姓者,傍花徐步而入。

忽见小绣车数十队,蜂拥而来,粗钗俊粉,媸妍不一。中有一女子,凹面挛耳,齞唇历齿,而珠围翠裹,类富贵家女,抹巾障袖,强作媚态。生与马皆失笑。末有一车,上坐韶龄女郎,荆钗压鬓,布衣饰体,而一种天姿,玉蕊琼英,未能方喻。生异之,与马尾缀其后。轮轴喧阗,风驰电发,至一公署,纷纷下车而入。生殊不解。询之士人,曰:"此名桃夭村,每当仲春男女婚嫁之时,官兹土者,先录民间女子,以面目定其高下,再录民间男子,试其文艺优劣,定为次序。然后合男女两案,以甲配甲,以乙配乙。故女貌男才,相当相对。今日女科场,明日即男闱矣。先生倘无室,何不一随喜。"生唯唯,与马赁屋而居。

因思车中女郎,其面貌当居第一;自念文才卓荦,亦岂做第二人想。倘得天缘有在,真不负四海求凰之意。而马亦注念女郎,欲赴闱就试。商诸生,生笑曰:"君素不谙此。何必插标卖钱帐簿

耶?"马执意欲行,生不能阻。明日,入场扃试,生文不加点,顷刻而成,马草草涂鸦而已。试毕归寓,即有一人传主试命索青蚨三百贯,许冠一军。生怒曰:"无论客囊羞涩,不足以餍老饕,即使黄金满屋,岂肯借钱神力令文章短气哉!"其人羞惭而退。马蹑其后,出囊中金子之。案发,马竟冠军,而生忝然居殿。生叹曰:"文字无权,固不足惜,但失佳人而获丑妇奈何?"

亡何,主试者以次配合,命女之居殿者赘生于家。生意必前 所见凹面挛耳、齞唇历齿者,及揭巾视之,黛色凝香,容光闪烛, 即韶龄女郎也。生细诘之。曰:"妾家贫,卖珠补屋,日且不遑, 而主试者索妾重赂,许做案元,被妾叱之使去,因此获嫌,缀名 案尾。"生笑曰:"塞翁失马,焉知非福?使予以三百贯钱,列名 高等,安得今夕与玉人相对耶?"女亦笑曰:"是非颠倒,世态尽 然!惟守其素者,终能邀福耳。"生大叹服。翌日,就马称贺。马 形神沮丧,不作一词。盖所娶冠军之女,即前所见抹巾障袖、强 作媚态者也。笑鞠其故,此女以千金献主试,列名第一,而马亦 夤缘案首,故适得此宝。生笑曰:"邀重名而失厚实,此君自取, 夫何尤?"马郁郁不得意,居半载,浮海而归;生笃于伉俪,竟 家于海外,不复反矣。

锋曰:钱神弄人,是非颠倒;岂知造化弄人,更有颠倒钱神之柄哉!然此女出千金装不吝,意气故自不凡,即谓之嘉耦亦可。 (《谐铎》)

鲛 奴

茜泾景生, 客闽三载, 后航海而归, 见沙岸上一人僵卧, 碧 眼蜷须,黑身似鬼,呼而问之。对曰:"仆鲛人也。为水晶宫琼华 三姑子织紫绡嫁衣,误断其九龙双脊梭,是以见放。今飘泊无依, 倘蒙收录,恩衔没齿。"生正苦无仆,挈之归里。其人无所好,亦 无所能,饭后卦池塘一浴,即蹲伏暗陬,不言不笑。生以其穷海 孤身,亦不忍时加驱遣。洛佛日,生随喜昙花讲寺,见老妇引韶 龄女子, 拜祷慈云座下, 白莲合掌, 细柳低腰, 弄影流光, 皎若 轻云吐月。拜罢, 随老妇竟夫。迹之, 入于隘巷, 访诸邻右, 知 女吴人,姓陶氏,小字万珠,幼失父,为里党所欺。三年前,随 母僦居于此,生以孀贫可啖,登门求聘,许以多金,卒不允。生 曰: "阿母居奇不售,将使令千金,以丫角老耶?"妇笑曰: "蓝 田双璧,索聘何嫌?目女名万珠,必得万颗明珠,方能应命:否 则千丝结网,亦笑越客徒劳耳。" 生失望而回,私念明珠万颗,纵 倾家破产, 亦势难猝办。 目则书空, 夜则感梦, 忽忽经旬, 伏床 不起。延医诊视,皆曰:"杂证可医,相思疾未可药也。"瘦骨支 床, 恹恹待毙。

鲛人入而问疾,生曰:"琅琊王伯舆,终当为情死。但汝海角相依,迄今半载,设一旦予先朝露,汝安适归?"鲛人闻其言,抚床大哭,泪流满地。俯视之,晶光跳掷,粒粒盘中如意珠也。生蹶然而起,曰:"愈矣!"鲛人讶其故,生曰:"予所以病且殆者,为少汝一副急泪珠耳。"遂备陈颠末,鲛人喜。拾而数之,未满其

额。转叹曰:"主人亦寒乞相,得宝骤作喜色,何不少缓须臾,为君尽情一哭也。"生曰:"再试可乎?"鲛人曰:"我辈笑啼,由中而发,不似世途上机械者流,动以假面向人。无已,明日携樽酒,登望海楼,为主人筹之。"生如其言,侵晨,挈鲛人登楼望海,见烟波汩没,浮天无岸。鲛人引杯取醉,作旋波宫鱼龙曼衍之舞,南眺朱岸,北顾天墟,之罘碣石,尽在沧波明灭中。喟然曰:"满目苍凉,故家何在?"奋袖激昂,慨然作思归之想,抚膺一恸,泪珠迸落。生取玉盘盛之,曰"可矣。"鲛人忧从中来,不可断绝,放声一号,泪尽乃止。生大喜,邀之同归。鲛人忽东指笑曰:"赤城霞起矣!蜃楼十二座,近跨鼍梁。琼华三姑子今夕下嫁珊瑚岛钓鳌仙史,仆限已满,请从此逝!"耸身一跃,赴海而没。生怅然独反。越日,出明珠,登堂纳聘。老妇笑曰:"君真痴于情者,我不过以此相试,岂真卖闺中女,腼颜求活计哉?"却其珠,以女归生。后诞一子,名梦鲛,志不忘作合之缘也。

铎曰:"借穷途之哭,为寒士之媒,鲛人之术奇矣。吾更奇乎 阿母始索其聘,继却其珠,使绝代娇姿,闺房吐气;否则,量石 家一斛珠,虽高抬声价,亦何异卖菜求益者乎?"

(《谐铎》)

村姬

内姑丈陈公永斋, 己丑大魁天下, 给假南至。归田水铺, 旁 有小村落,绿树阴浓,野棠花妥,顾而乐之。逐步屧独行,忘路 远近。村尽处, 见竹篱半架, 左有双黑扉, 一女郎倚扉斜立, 捉 风中絮, 搓掌上, 嗤嗤憨笑。陈睨之, 魂飞色夺, 因兜搭与语。 女郎不怒亦不答。但呼阿母来。亡何,一驼背媪出,问女何为。 女曰: "不知何处来一莽汉, 烦絮煞人!" 陈意窘, 诡以乞浆告。 媪曰:"斗室难容客坐,小慧取一盏凉水来!"女嗷声而进。陈曰: "令爱年几何矣?"媪曰:"但记其生年属虎,不知今当几何岁矣。" 问婿家为谁。媪曰:"老身残废,止此一女,留伴膝下,不欲遣事 他人。"陈曰:"女生有家,膝下非常策也。"适女取凉水至,闻余 语,大声谓媪曰:"是客不怀好意,毋多谈!"媪笑曰:"可听则听, 是诚在我, 婢子何必琐琐。" 陈乃夸状元以歆动之。 娼俯思良久曰: "状元是何物?"曰:"读书成进士,名魁金榜,入词垣掌制诰, 以文章华国,为天下第一人,是名状元。"媪曰:"不知第一人, 几年一出?"曰:"三年。"女从旁微哂曰:"吾谓状元是千古第一 人。原来只三年一个! 此等角色也向人喋喋不休, 大是怪中!" 娼 叱曰:"小妖婢嚣薄咀,动辄翘人短处!女曰:"干依甚事,痴儿 自取病耳。"一笑意去。陈惘然失之,继而谓媪曰:"如不弃嫌, 敬留薄聘。"脱囊中双南金予之。媪手摩再四,曰:"嗅之不馨, 握之则冰,是何物哉?"陈曰:"此名黄金。汝辈得之,寒可作衣, 饥可作食,真世宝也。"媪曰:"吾家有桑百株,有田半顷,颇不

忧冻馁。是物恐此间无用处,还留状元郎作用度。"掷之地曰:"可惜风魔儿,全无一点大雅相,徒以财势恐吓人耳!"言毕,阖扉而进。陈痴立半晌,嗟叹而返。

铎曰:"黄口金多,乌纱势横,古今多少男子,缘此摧磨傲骨。 不谓闺阁中有此诙谐人也。石榴裙底,当叩首三千下矣。"

(《谐铎》)

谭 九

京都花户子谭九,奉父母命探亲于烟郊。策卫出门,目已向夕。道遇一媪,衣悬鹑,而跨白颠马,鞍辔华美,左右相追随。问小郎何往,谭以所之告。媪曰:"此去烟郊尚数十里,路多积潦,颇不易行,小郎不闻乎?风度蒲牢,都城漏下矣。荒野寂寥,保无有暴客相值?茅舍在迩,盍留一宿?翌日早行,得从容也。"谭正恇怯,闻言深荷其谊,媪策马先导,循僻径约二里许,隐隐见林际灯光,媪以鞭指示曰:"至矣。"纵辔即之,则矮屋两椽,土垣及肩,媪弃骑启扃,延客入室。室中空无所有,唯篝灯悬壁。一少妇卧炕头哺儿,媪呼曰:"有客来!媳妇可速起!"妇徐起掠鬓,儿呱呱啼,媪探袖出胡饼一枚,付之,啼始止。谭视妇,年可二十,泪睫惨黛,殊少欢容。媪曰:"汝起烧茶,老身送马便回。"言讫,出户牵马去。

妇折穄引火于灯,着红布短袄,绿布裤,蓝布短袜,跋高底

破红鞋,皆敝甚,露一肘一腓,并两踵焉。谭年少口讷,不能致诘,但阴怜之。俄而,媪还曰:"为还代步,致郎寂坐。渠宅上闻有客至,亦欲延款,老身辞以太晚,嘱为致意。"谭唯唯。媪曰:"奔驰半日,想客亦苦饥矣。媳妇备饭来!老身且出喂驴。"谭曰:"相扰何安!刍豆之费,临行当厚偿。"媪摇手曰: "莫漫作客套语,所值几何哉!"既而,饲驴已,妇陈列酒淆,瓦器绝粗,折稊为箸,以盆代壶,而淆皆鱼肉,但冷不中啖。媪移灯劝谭饮,谭辞不能酹,乃进饭,饭又冰冷,勉进一盛。

妇敛具去,相与坐话。妇就灯为儿捉虱。谭曰:"听姥言,似 非京师人,娘子则又旗妆,敢问邦族?"媪曰:"诚如郎说,身本 凤阳侯氏, 因岁荒流离入京, 为人缝纫补缀, 谋衣食, 再醮此间 村民郝四,近三十年,今成翁矣。生一女一子,女已适人,子为 圬者, 居城中, 翁以衰耄佣于野肆中, 为人提壶涤器。小郎明日 当过其处, 见鸡皮白髭, 耳后有瘤如卵大者, 即是也。媳妇余氏, 实宅上婢子, 其主人为巴参领, 久退闲, 幼主袭职矣, 适借马处 也。"谭曰:"视姥家亦甚清苦,何苦盛设待客?"媪笑曰:"仓卒 客值,茅舍主人岂能咄嗟办此淆饍,亦缘中元节,例分得宅上馂 余,方愧亵渎,敢云盛设?"谭坐久颇倦,又不便偃息,乃出具 就灯吸烟。妇频唆,有欲烟之色。媪察知其意,亟拊掌曰:"媳妇 垂涎吃烟矣,小郎肯见赐否?"谭以烟囊付之。媪日:"近以窘迫, 不有此物已半年矣,那得有烟具。"谭乃并具奉之。妇吸之甚适, 眉颦顿舒。媪视之,点首曰:"老身在世六十余年,不识此味,诚 不解嗜痂者,何故好之如此?"谭曰:"亦事不解,第不会则已, 学会辄一刻不能离,宁可食无饭,不可吸无烟也。" 娼大笑。谭曰:

"娘子嗜此,予迟日当市具与烟来,作野人芹敬。"媪颔之。谭出 溲, 见银河西耽, 斜月在林, 约略四更。媪扬声于室曰: "客不时 欠伸, 当使寝息。"谭应曰:"尚可稍坐。"媪曰:"勿太勉强, 明 日尚有路行,更有所恳,望留意。"谭问何事,媪惘然曰:"明日 过肆, 苟见我家老翁, 烦为致声, 促其急送数缗钱来, 但言家中 吃着都尽矣。"谭曰:"无不尽心。"媪又赧然曰:"以贫故,并无 被 ,一夜屈郎甚矣。"谭曰:"假一席地,得一夕安,已承厚贶, 敢过望耶?"因各就枕谭疲极,着枕便熟睡。既而梦回,觉草虫 鸣于耳畔, 萤火耀于目前, 矍然惊起, 则身卧松柏间, 秋露湿衣, 清寒砭骨,系驴树根上,龁草不休,茅舍乌有,媪与妇并失所在。 但见古冢颓然, 半倾于蒿莱枳棘之中而已。不禁毛发森竖, 急捉 驴乘之,得得而驱。行三五里,天已向曙,稍稍心定。抵烟郊事 毕,复遵故道,小憩旗亭,有涤器老人,酷肖侯媪所述。询之, 果郝四也,愈异之。引至僻处,告以前处所遇。郝泫然曰:"据郎 所见, 真先妻与亡媳并夭孙也。先妻下世二年, 亡媳去岁以难产 母子一夜皆死, 讵意尚聚首地下哉?"谭亦恻然, 又问:"巴参领 为何如人?"郝曰:"某旗某佐领之父也,死已十余年矣,直北乔 木处,即其墓道。亡媳,其家婢也。老朽夫妇,故其守墓人,往 岁零雨,屋舍倾圮,佐领无力缮葺,老朽无容身处,故佣工于此, 聊以自活。前日中元节, 佐领展墓, 犹焚船马数事。第不知亡妻 借马,何事何之耳。"谭感叹久之,乃解囊赠以青蚨,五百,俾具 冥资,勿致魂馁。郝泣谢。谭归后,不欲食言于鬼,亟备纸烟具 二枚,烟一封,重至其墓,祝而焚之。更访巴参领墓,果在直北

数十武外, 松柏森郁, 有新碑可扪云。

(《夜谈随录》)

翠衣国

陇蜀故多鹦鹉, 土人恒罗之以为玩具。成都人蒋十三, 畜一 佳者,驯养数年矣。一日,有鸜鹆来止于树杪,呼鹦鹉为"能言 公",隔笼与之语。询之曰:"君不游翠衣国几年矣?"答曰:"丙 年离乡, 丁年罹罗, 今居樊中, 岁又三稔, 通其首尾计之, 已五 易春秋矣。" 鸜鹆又曰:"颇亦思归否?"答曰:"胡不思归? 君不 知我,我非生而羽者也。犹忆昔年为商贩于湖湘间,贾尝三倍, 且颇善言语, 恒为人解纷, 人无有难之者。某岁春仲, 与同伴航 海,将谋重利。行至一岛,碧嶂插天,蔚蓝无际,偶拉客伙数人, 登眺其上,愈入则其境愈佳,涉历既深,顿忘归路。岛中无一人, 惟有公辈飞鸣上下,不知几千万亿,予等病不能兴,又无戈获之 具,可仿罗雀之风,遂饿死于岩下。他人我不能知,予则渺渺然 游行至一国, 见宫殿巍峨, 城郭富丽, 其人无贵贱, 皆衣翡翠裘, 予询之,人曰: '此海中第七岛,翠衣国也。'予因谒见其王, 欲图归计。王年可五旬,亦衣翠服,能识义理,通阴阳。其国中, 上大夫必能诗,中大夫皆能曲,下大夫亦能言,以捷给为才,从 无有不鸣者。遂馆予为客卿,后以贵主下降。主貌娇好,亦娴歌 咏,与予伉俪甚欢。明年,为予制此阴之,遂能举。飞时,与主 翱翔于茂树,倡随无间。不意为近侍所诱,将欲归视故乡。行至山中,下而取食,为人所获,羁絏于兹不能返,每思主爱,如割寸心。君今去,能为我致一口音,则幸矣。" 鸜鹆曰:"愿为驿使,虽远无辞。" 鹦鹉乃低吟一绝曰:

双飞何日向晴皋,每为卿卿惜羽毛;最是舌尖消瘦尽,绕笼犹自语叨叨。

诗成,俯首拳足,若不胜情。鸜鹆即振翼而飞,回翔而语曰: "必不辱君命,匆过伤。"遂飞去,时蒋卧小窗下,陈宇无人,闻 其语,甚为惨然。乃起辟其笼而纵之,且嘱曰:"翠衣国路远,子 宜自爱,慎勿再罹网罗之灾。"语竟,鹦鹉啁嗻作谢,飘然高举, 渐入云汉间,不转瞬而逝。蒋以此事语其家人,多不之信。且疑 其故纵。蒋竟无以自明。

逾年,蒋患疾疫,病垂毙。迷惘中,见有人皂衣而鸟喙,直前启曰:"君家之囚,已言于翠衣国主矣。命仆奉延,请即税驾。"蒋正昏馈,莫知所措,竟毅然随之行。其人奋臂一呼,早有绿衣人十数辈,驾一肩舆,舁之前往。须臾,至海上,波如山立,心甚惴惴。视其舆,轻犹一叶,去水仅寻余,毫无沾湿,行且如飞。既至,有绝境,都如鹦鹉所言,即有人迎于郊外,俯伏路旁,引吭而谢曰:"主君体好生之德,罢悦耳之具,网开三面,德并二天,使折翼之禽,无难旋里;嫌笼之鸟,竟得生还。不独乐昌之镜重圆,抑且若敖之鬼不馁。感恩涕泣,深愧衔环。拥篲郊迎,聊酬翼卵。"言讫,伏地哀鸣,一若感激不胜者。蒋自舆中窥之,驺从甚盛,冠盖甚都,其人年二十许,翠衣翩跹,疑即昔日所纵者。

乃降與慰劳,并驾而进。入其国,人皆衣碧,语言俱带鸟音。将至路门,国王躬亲迎迓,揖而言曰:"寡人愚昧,国禁废驰,致令金闺爱婿,辱于弋人。微先生释之归里,则弱女无与并栖,即不谷亦无与共治矣。"语甚谦。蒋目之,貌古神清,被服赫奕。因逊谢。国主揖蒋入,延至殿廷,纳之上座,将下拜,蒋辞让至三,然后以宾主礼相见。既坐,国主又言曰:"儿女辈赖君完聚,时铭五中,无由申报。时闻病在床蓐,故遣剪舌侯奉邀,幸辱惠临,当令叩谢。"因命传语后庭,使白贵主。旋铺红毹于地,俄有小环十余。自屏后捧一丽人出。齿甚稚,衣翠羽之服,玉声璆然。夫妇并肩,皆北面再拜。蒋不获辞,却而后受。主即退。国主命设宴于望祢亭,与蒋欢饮。且告曰:"此寡人跂望正平之地也。异世知心,

今与君为二矣。"于是飞觞痛饮。诸大夫皆在坐,有献诗者,有歌曲者,纷纷而前。蒋亦不甚记忆。国主知蒋有恙,命取海中神露,和酒饮之,恍若沃以冰雪,病遂除。宴毕,国主谢曰:"敝路褊小,土产绝稀,不腆敝赋,未足以敝大恩。聊供君之玩好,幸勿挥斥。"乃进明珠十粒,紫玉一双,约值数千缗。小鬟又传夫人命,致水心镜一围,珊瑚树盈尺,曰:"敬以报钗合镜圆之德。"贵主夫妇,又私自赠遗。国主命寄于近海市肆,以券付蒋,令其自取。乃命皂衣人送之还。国主冰玉亲饯于郊,握手流连。蒋思归念切,登舆而返。

比至家,举室号啕,将殓尸于榇,死已二日矣。蒋推衾而起,家人大惊,询之,始得其故。出视庭柯,有鸜鹆爰止未去。爰悟 所谓剪舌侯者,即此是也。乃设食饲之,三嗅而作。蒋疾大愈, 欲诣海肆合其券,家人以为妄,力止之,遂不果行。至今蜀人呼 鹦鹉为"能言公",其遗意云。

(《莹窗异草》)

秦吉了

剑南巨家,蓄一婢,貌美而黠。主人颇宠之,不使与群婢伍。 时某太守,将致仕。以一秦吉了相赠,绝巧慧,能作人言。主因 命婢司其饮啄,此外无余事也。一日,婢饲鸟。鸟忽言曰:"姊哺 我,当得一好姊夫。"婢羞,扑之以扇。鸟亦不惊。自是鸟有所语, 婢或戏而答之,或笑而詈之,习以为常。婢亦不甚介意。盖婢独 居一室,鸟即悬其闼,喁喁小窗,俨然伴侣。人亦莫得问焉。

又一日,婢浴于室。忽闻鸟语曰:"姊故好身体!"婢大恚,白身往扑之。适鸟亦新浴,因驯,未闭其笼,竟振羽而出,绕屋周匝,婢捉之倍亟。鸟忽洞穿窗纸,翱翔而去。婢遂仓皇无措,深惧主责,顿生狡狯。著衣后,即移宠于檐下,径诣主前泣诉曰:"婢子偶不谨,闭户澡身,不意为人所中伤,竟放鸟去,情甘罪责,死无怨。"主人素怜婢,且悉众有妒心,果不究典守,而反究他人。其计亦谲矣。既而莫得其主名,亦姑置之。

旬日后,婢奉主母命,往省同邑梁孺人。其子名绪,犹未婚, 方昼读于斋中,俄有鸟飞集其案,作人语曰:"为君觅一佳配,盍 往视诸。"绪惊而谛观,则一秦吉了,因释卷而逐之。鸟飞甚缓, 甫出院门,见有二八妖环,青衣红裙,冉冉自外入。鸟忽失所在。 绪睨女貌,美丽不群,乃托故,尾之以行。直入室内,与母絮絮 话言,始悉为某巨家婢,而姿容态度,娴雅动人。婢见少年郎, 亦时时顾之,两情颇眷恋,但不能通片语。

良久,婢自归。既覆主命,言旋其室。空笼故在床侧,瞥见前鸟,暝目拳足憩息其上。大喜,如获拱壁。将执之,复置诸樊。鸟大噪曰:"予为姊奔波几殆,幸得好姻缘,何犹欲以此困我耶?"婢奇其言,诘之。鸟一一缅述。婢顿悟,遽敛其手。鸟亦不飞,止于榻上,谓婢曰:"予虽不能如昆仑,出姊于重垣之外,然姊之心事,非予莫与之传,姊果有意乎?"婢缅腆不答,鸟作笑声曰:"女儿之态,固如是。虑有人来,予且去。"言已,振翮而飞,旋不见。婢因慕绪之丰采,且耻为画屏姬,反侧中宵,不能自主。

明日,鸟瞷无人,又复爰止,婢招之即下。因言曰:"主人甚爱予,必不忍以珠弹雀,况梁生青年才俊,纵慕少艾,讵屑以婢妾充好逑!费子苦心,恐事不谐,可奈何?"鸟解所言,两翼旋作,至夕始还。乘昏覆婢曰:"梁生之情,见乎词矣!"因诵其所吟曰:"不妨团扇白,祗喜玉颜红;倘遂乘鸾愿,终应跨凤同,"婢闻而心喜,遂以意授鸟。侵晨,复纵之去。乃绪在萧斋,日夜注念于婢。朝起仰视翔禽,颇似畴昔之鸟,因戏曰:"卿能语我可人乎?当为汝立传。俾与苏武之雁并传。"语未已,鸟忽垂翅而下。集于粉垣,与绪对语,致婢相思之意,并所虑之深。绪大悦,因诘:"婢知书否?"鸟答曰:"颇识之。"绪即立草数行,备叙渴衷,兼矢永好。缄封而置之地,鸟即下而衔之。径飞去。绪益骇,叹其奇。

乃自此数日,不再见鸟,而婢之音耗顿绝。正怅望间,忽传巨家有婢死,既已稿葬。绪心动,疑而询之,果即意中所属者,大恸几失声,而亦莫解其故。殊不知鸟衔笺去,婢见之,愧不能书,乃撤玉瑱一事,畀鸟覆之,并告以父母所在,浼去物色之,啖以重金,则蛾眉不难续,鸾俦可立效矣。鸟唯唯,衔之高飞,至中途,突遭恶少,试以弹丸,中其颊,鸟遂殒越,身命俱捐。居无何,而婢之祸作。初,巨家以色宠婢,将以列之小星。婢颇不愿,退有后言。迨婢以失鸟之故,嫁祸于人,虽未遭箠楚之威,而同列者,靡不侧目,且虑其专房恃宠,行将长舌为灾,遂群起而攻。闻其在室与鸟言,夜半不辍,乃诬与人有私,播之主耳。主闻之,甚怀醋意,搜诸室内,得绪书,益为勃然,毒加考讯,婢以事涉荒唐,无能自明,遍体疮痍,奄奄待毙。主亦不待其死,生纳诸棺,命仆瘗之野。

此婢之绝命本末,在绪亦未深知。惟有怆怀埋玉,坐而伤神,不禁隐几而卧。忽梦一女子,羽衣蹁跹,直前敛衽,曰:"妾即秦吉了也,与某家姊本同类,渠以善行,得以转轮为人。妾与之邂逅复聚,虑其辱于庸夫,敬以先容于君子,不意妾半途折翼,致姊竟遭烁金,负屈重泉,良堪扼腕。虽然,幸有生机,非君孰与援手?"绪梦中大喜,起而询之。女子戟手一指,曰: "郊行百步,薛涛坟固不远也。"顿扑地化为孤鹤,凌空而上。

绪惊寤,即命仆马,访诸邑外。偶忆北堡村名,似合隐语, 径诣之。果得婢之葬处,而未敢遽开。假村中一席地,至夜,以 利啖仆,同往启之。所瘗故不甚深,及棺静伺,似闻呼吸之声。 亟破之,婢果复活。绪遂惊喜如狂。左近在尼庵,卑礼叩之,缅 陈其故。尼亦乐于为善,慨然许之,相与扶婢出穴。绪亲负之以 行,寄养阉中,资以薪水,然后归。

月余,婢竟光彩如初。绪乃浼尼为撮合山,托言贫家之女, 力白于其母。母往视之,虽一面之识,颇能记忆。婢因泣诉其情。 母素爱子,不违其意'径为之迎娶于家;且因婢故,不与巨家通。 巨家亦以婢故,杜绝往来。婢之踪迹因以秘。惟绪念秦吉了之德, 遇有捕获者,必市而纵之。人咸疑讶,至巨家中落,尼乃泄其春 光。说者遂得梗概如右。

(《莹窗异草》)

青 眉

皮工竺十八,邑之鄙人也。年仅弱冠,貌姣好如女子。虽居 市 ,里之美少年,莫之能掩,以故有俊俏之号。其室曰青眉, 色尤殊丽,见者疑为画图。初,诘其所自,坚讳不言。后乃稍稍 露之,则实北山之狐也。

盖竺少佣于乡,始学裁皮,年甫十六耳。师嗜酒,夜出恒不归。肆中惟竺一人缝纫,至中宵然后就寝,率以为常。一夕,师又出,竺方夜作,闻弹指声,意为比邻取履者。隔扉询之,则答曰:"侬。"其音绝娇细,竺大骇。且虑为市中恶少侦其师不在,来寻断袖欢,心益惴惴。乃给之曰:"已卧矣,客请明日来。"外

又曰:"侬非暴客,实邻女也。曷开我,与若一言。" 竺不得已, 从板缺觇之,果似女人垂鬓立于檐下,因启之,女径掩笑入。竺 视其貌,容光照映斗室,虽少小,心亦不能无动,遂腼然诘所自 来。答曰:"家居距此咫尺,缘夜绩,烛为风灭,特来乞取新火, 非有他也。" 竺素醇谨,慨然与之,不敢交一言,女亦持炬径去。 竺虽未通情话,而心颇爱好,冀其复来。乃师归,女竟不再至。 日夕坐肆中伺之。亦杳无其迹。无何,师又他往,女则又来乞火。 两情渐稔, 欣然延入与坐谈。女以年岁询竺。答曰:"一十有六矣。" 女微笑曰: "阿侬适与君同庚。" 竺亦询女之居址。答曰: "久当自 悉。"絮语移时,犹无去志。竺亦贪其貌,眷亦勿舍。四目痴凝, 将不可解。女忽回顾衽席,谓竺曰:"此即君之卧榻耶?恐逼仄不 足以容二人。" 竺会其意, 乃答曰:"卿试先卧, 看能容否?"女 笑而起曰:"来夕当试之。"又复去。竺终腼腆,弗能挽留,然已 心志蛊惑矣。晨起,无心操作,惟冀其师不归,得以成此佳会。 而师果为麴蘖所羁,向晦不复。心益悦,及昏,明灯兀坐,形状 类痴, 亦不再捆履。漏下二鼓, 女果来。启户款入, 则靓妆艳服, 迥异昨之朴素。询之, 笑而不答, 径登竺榻而壁卧。竺知其惧羞, 乃熄火就枕。及寤,而东方已白。竺尚流连,女早揽衣先起曰:"乐 正未央,不可使他人窥见底里。"乃去。竺起而师返。

女绝不来, 竺亦不以为讶。阅数夕, 乘师之出, 又复欢会, 款治且倍于初,起谓竺曰: "侬自见君, 顿为情系。以故不以自坚, 致有前宵之事。今幸两相欢爱, 生死勿渝。君能不弃, 即以妾为糟糠妇乎?" 竺嗫嚅良久, 始答曰: "阿谁不愿。但予幼失怙恃,

育干兄嫂, 今从师习此末艺, 将来尚未知若何, 谁有余资为余纳 妇耶? 且年齿尚卑, 尤未敢漫然启口。"女曰:"然以侬计之, 君 能辞师出游,妾自能相君方业,奚为仰人眉睫,使我燕尔不安。" 竺恍然,乃诘之曰:"若言有家在,岂无父母而可自主耶?"女笑 曰:"妾初给君,今乃悟平?侬字青眉,居北山,实狐也。羡君玉 貌,故假邻女以相就,岂真有高堂为予缚束者。"竺年幼,且贪新 欢, 茫不知惧。唯曰:"闻狐恒为人害, 信然否?"女曰:"亦信 有之。而妾非其伦也。妾不爱君,亦不屑至此。爰之而复杀之。 宁能见容于天地乎?"因侃侃鸣誓。竺亦相信不疑。临去,授竺 以策。竺如其教,启于师曰:"昨闻里人言,予嫂病且甚危殆,予 少受其抚育,请给假一归省视。"言已泣下。师亦微闻其嫂病,见 其悱恻,心甚悯焉,乃自营肆务,遣之行。竺出肆,未及里许, 女早迎于道周,问之曰:"君将奚适?"竺曰:"将归予家。"女大 笑曰:"君误矣,若往汝家,有兄嫂在,其何能从之。"竺曰:"为 之奈何?"女曰:"侬视之,君业虽未能游刃有余,而尚可以讲乎 技: 妾幸有薄资,请与君游于外郡,自主生计,必有以愈于为人 佣。君以为如何?"竺本漫无主裁,欣然从之。女出白金一锭, 觅舟南行。竺与女倡随其乐,亦不念及乡族。

舟抵常熟,女犹欲前进,竺不愿,乃僦居邑之北门,女又以金半笏,为营肆具,遂开设于市中,其后为居室。女以竺齿尚稚,不令合人生理。凡竺所不能制者,女皆代疱为之。式甚新奇,名乃大噪,邑中之履咸归焉。女亲操井臼,治饔餐,暇则织履相夫子,恰恰然无怨色。竺益心德之,明年,竺已十七,家小裕,志遂少荒,数从无赖游。女禁之,小听。适常熟有富家子,性佻达,

尤好龙阳君。时来肆中市履,见竺之色,深悦之。会竺与无赖交, 乃以重金啖倩无赖。值望后, 月色甚明, 置酒于邑中慈觉寺, 邀 竺为长夜饮。竺以他故给女,遂从无赖行,至则富家子亦在坐, 极致款曲。竺素限于量,饮未半,已不胜酒力。众引之别室,俾 其小憩,实则以计嬲之也。竺方转侧欲眠,忽闻人小语曰:"舍妾 孤栖, 君乃在此高卧耶?"竺亟张目视, 则青眉立于榻侧, 因诘 其何以至此。女曰:"君之危若履虎尾,犹问乎?请即从妾归。" 竺内惭, 因诈以醉辞。女以气噀竺面, 冷若觱栗之风, 酒顿醒, 强起随之行。女顿以纤腕相握曰:"去!去!"遂悄然出走,恍若 梦寐,而身早在室中矣。既归,女延之坐,长跽且数之曰:"妾携 君远离故里, 虽不敢望君大成,亦官自爱。今君数作游荡, 几以 丈夫之躯,陷入妾妇之队。使狡谋果遂,不独妾羞为弥子之妻, 君又有何面目,归向桑梓乎?"语甚悲咽,泣下数行。竺愧悔无 以自容,颜色沮丧,莫措一词。女恐其过惭,乃起以温言慰藉, 曰:"后无复然,过贵干能改也。"遂仍欢好,不再言。乃富家子 疑竺为妖,与众共首于县。时巴陵苏荩臣,以进士宰常熟,素稔 富家人有邪行,不欲究其事。然因马朝柱一案,逮捕妖术甚亟, 爰命役拘竺。竺至, 公见其少小, 且事涉暖昧, 略加研诘, 意笑 遣之。

些归肆,女忽谓之曰:"是地不可复居,将有祸至。"遂货其器具,束装北行。徒家于瓜步间,爰卜山阳之南郭而居之。女以竺少不更事,前因多资,至荡其心,遂不复设肆,日令竺荷担入肆,所得者仅足糊口。己乃茅屋数椽,纺绩相助,此外别无赢余。

竺渐不能堪。每出, 窃与市儿赌。始以获采, 少助杖头, 遂欣欣 以为得意。故女知而不问。一日,女出汲,突遇同巷某。瞥见之, 惊以为神仙中人。盖某业赌博,以得罪于势豪,方切忧惧。见女, 居为奇货,顿思假此以为释憾之计,献媚于豪。因乘间以言饫竺 曰:"子业此欲赡两口,势必有所不能。且男子远离乡井,当思奋 身立业,始可归见里族,若仅日觅蝇头,竟同株守,不第不能归, 归亦何颜也。"竺闻言,适中所患。乃咨嗟曰:"君言良是。但无 处措赀。业何由立?"某又佯为踌躇,徐曰:"此事亦非大难,某 同辈中某某,均以搏起家,获资巨万,闻子采兴其高,战无不利, 盍为此不母而子之策? 白手可致素封, 犹愈于坐操会计多多矣。" 竺本以此自负,又不禁歆羡之私,遽攘臂曰:"君能货我数缗,我 当试一为之。看花骨子,非我如意珠耶?"某慨然许诺,暮又偕 一人来曰: "予适小匮乏,货于此兄,幸如数。请即署券。"竺 素不能书,女虽能,又不敢以告,即倩某捉刀。其名实即某豪, 竺不及知也。其一人得券,即以资付竺,匆遽而去。竺亦未及致 诘,径携资就某家赌。其始小胜,后乃大亏,比及鸡鸣,早已万 钱立罄。众哄然散去, 竺亦垂首而归。抵家倦卧, 女故悉其所为, 亦不致诘。又明日, 竺诣某处, 与商背城之策, 数往皆不遇。瞬 息月余,某忽偕数人至,衣帽甚都,前人亦在内。某谓竺曰:"积 欠猝未能清,其子可偿也。" 竺为此故已私蓄千钱,毅然曰:"息 几何矣?"答曰:"五十缗耳。"竺骇曰:"其母仅十千,其子何反 数倍耶?"众 曰:"语都不类。"亟出券令竺自阅,则已千缗实 书其上矣。竺不觉颈赤,与某力争。某亦不相下,手口交加。众 咸怒曰:"逋欠者亦敢肆虐耶?"遂群殴之,几毙而后去。邻人有

怜竺者,扶掖入室。女为之抚摩疮痍,毫无诟谇,人益贤之。

诘朝,豪仆又来取索,旦风示其指曰:"能以妇偿,百缗尚可 得。"竺大詈之。其人即返,又引前数人来,挝门秽辱,比邻俱掩 耳恶闻。女背竺出,亟止之曰:"若勿尔尔,若之意,在人不在资, 侬已知之。但竺为侬夫, 今甚狼狈, 伉俪之情, 不忍遽绝。归与 若主言: '果相悦,俟竺愈径来相迎,侬固不惜此一身。'"豪仆 闻之皆喜,敬诺而去。里中聆其言者,俱以女为缓攻计,即竺亦 不疑其有去心。浃旬, 竺已复初, 惟忧豪家来索逋。已而果至, 女出与之约, 竺亦不能尽知。晚间, 女置酒室中为竺庆。少酣, 女起,满斟而语之曰:"妾为君妇,三载于兹,不克有所裨益。既 致君离其乡里,骨肉不通笑言;今又以蒲柳之庸姿,辱君于狂奴 之毒手,心实柞焉。刻下积逋无偿,进退维谷,君将何以处之?" 竺默然,既而叹曰:"予诚不肖重负吾卿。豪家之事,情甘与之涉 讼,他复何言?"女泫然曰:"君奚固执若此?君以异乡之身,与 豪右相较, 危可翘足而待。若整装急旋故土, 上可广先人之祀, 下可酬兄嫂之恩。计诚莫逾于此。"竺已喻其恉,因曰:"我归, 子将若何?"女曰:"豪之所图者色也。妾以色事君,即以色事豪, 渠必不追吾夫矣。" 竺艴然色异曰:"是何言也!予宁死,不以妻 抵债!"女遂不再言。及寝,又以利害说之,竺方首肯。女即起为 之治装,促之行,曰:"不可缓,迟则祸至矣。"竺尚留连,女强 之出门,以手麾之。竺遂不能自由,大奔若狂。直至百里外,始 复其故步。暮投旋店, 计去山阳已二日程。

竺终以女为念, 止不复前, 将以探其耗。阅五日, 果有自淮

上来者,且其熟识也。见竺,即尤之曰:"子诚负心,捐妻子而远 遁,令其死于强暴,情何以堪?"竺故预料有此,乃大恸。诘其 颠末,人曰:"尊阃至豪家,涕泣不食,夜出缢于其门,尸重不能 举。官知之,检其怀中,得血状具诉其冤。官将逮子, 莫知所往, 因置豪干法,并诱子者亦得罪。邻里咸称快。予来时,狱将具矣。" 竺心又少慰, 乃市楮镪祭之野, 痛哭至呕血。卧病传舍, 时时饮 泣,旋复迷惘。沉顿间,女忽欻然入,就榻抚视,且笑曰:"妾已 得生, 君何为欲死耶?"竺愕然曰:"闻卿已殉节, 今至此, 得毋 学桂英来索王魁命乎? 予诚负心, 殁亦无憾。"女又笑曰:"年已 如许大,何犹菽麦不辨,呱呱作小儿啼哉?妾本狐仙,宁无自全 之策? 向之殁者,特江间一片石,岂侬亦效痴妇人,做投缳鬼哉?" 竺夙知其灵异, 欣喜不胜。而病已甚惫, 女投之以药, 遂霍然。 女又谓竺曰:"妾不可露形于此,致人疑怪。当仍往前途候君,君 亦无久滞。"乃先行。竺至次日亦就道。至夕,与女重圆于旅次。 行谋他适。女不可,曰:"前因一时孟浪,屡踬于他乡。今而知安 乐莫如故土也。请即偕归,不再与君作汗漫游矣。"于是,出金为 竺制衣履并己之妆饰,遂返本邑。

初,竺之兄不见弟,欲讼其师。乡人有见竺远行者,力止之。 而兄嫂恒思忆不置。一旦见竺携艳妻复其邦族,咸惊喜。竺诡言 娶于它邑,人亦不疑。女以资授竺,使仍设肆于市,而迎其嫂与 兄奉养于家,曰:"为我约束狂郎,妇虽智,究难箝制夫也。"自 此,竺与女力作,家日以裕。余初见青眉,深异其非人。因再三 诘,竺甫肯缅陈其概。更谓予曰:"微君之文,予妻将湮没毕世矣。" 余亦喜其相夫之智,持节之坚,遂援笔而为之传。

(《莹窗异草》)

假 鬼

吾师马佩琛先生,数从南来。道经某地,失其名,御者辄迂道而过之,亦未暇诘其故。己亥仲春,自粤东罗定回辙,将赴京,复由其处,御夫则扬鞭径过,不再趋避。先生因微叩之。笑曰:"旧传斯地有女鬼,颇能为祟,故避之。比年已嫁去,径行固无害。"先生益怪而询之。御者指路侧一古冢,答曰:

"鬼居此中。衣色绯,被发吐舌,面颜无血色;每遇行旅一二人,辄出现,人恒弃其辎重而奔。如是者数年,殊不知其何怪。

"客岁有某者,未稔里居,中岁无妻孥,因赴淮北访所亲,少润囊橐而返,踽踽焉独行道中,顿忘是地有此异。比至,始忆之,遂股票不能前;既而侥幸其匆匆疾驰勿顾,盖乘鬼不及知也。俄闻冢中有声,啾啾长啸,心益惴惴。视之,一鬼自墓出,状如人所传,乃大怖欲窜。鬼行如风雨,呜呜然相逼而来。其人即欲弃所荷脱然而走;转念奔波千里,甫得此蝇头,一旦掷之,殊为扼腕;且鬼不过祟吾身,岂利吾有?因逡巡不能舍。鬼且咫尺,吼啸倍急,更呜咽作啼,致其人毛发胥竖,而终莫割所爱,踉跄思遁。鬼亦仅迫之,无敢前。其人急计顿生,思以老拳尝之,宁为鬼死,不甘财亡。爰出鬼之不意,直前搏之,随手而仆,一若荏弱不胜者,益得志,扬臂奋击,鬼早娇啼乞命矣。其人讶甚,

谛观焉:红笺数寸,飘扬绿莎,饰状如异鬼。

"其人不禁大骇,乃停腕诘之。则泣告人曰:'某家距此里许,身实女也。徒以老母在堂,终鲜兄弟,无已,腼颜而为此,以备甘旨之需。今已小康,但此身孑然未偶,曾默祝曰:有能识吾迹者,吾即夫之,不再作此腼态。幸所君遘,其命也夫。'其人闻言惊喜,意犹未信,遽捋其襟而验之,鸡头半垂,宛然闺质。益大喜,释之令起。女腼然整衣,导以同往。

"须臾,抵其家,茅屋低矮,篱落洒然,隐有殷实之象。初入,见一妪,龙钟残疾。女告之故。冁然曰: '固阻儿勿再出,今竟何如耶?虽然,郎君之胆,亦较升斗为巨矣。'因谓其人曰: '老妇孤孀已久,藉此女得以存活。向因无以养生,适古冢留一巨穴,渠遂作此狡狯。今且十稔,待缘未嫁。君若琴瑟尚虚,盍赘此为吾婿?小妮子亦无颜业此矣。'其人敬诺。是夕,即结为伉俪。女家颇裕,某亦心安。旬余遂移去,不知所往。"御言次,犹遥识其处,庐舍俨然。先生至都,每举以告人,靡不惊异。

外史氏曰: "风声鹤唳,草木皆兵,人自仓皇,鬼何能为崇哉! 而世之狡者,又故借幽冥劣相,以吓嗤嗤之氓,吾不知真鬼闻之, 其亦揶揄否耶? 犹忆京师某巷有鬼,夜深辄出,宵行者遭之,每 遗弃衣物,与此事颇类。巷中逻卒王某,醉中见之,其首如栲栳, 纸条飞鸣,周身皆白毫,约寸许,朱其目,赤其口,形状可怖。 王已沉酣莫惧,反嫚骂曰: '若鬼耶?应避人。汝反逐人耶!' 鬼闻之,折身却走如辟易。王察其有异,疾趋而前,捽之以力。 鬼亦仆。王审知为人,剥其面,褫其革,径抱以归。烛下视之, 则羊裘一袭,乱毛如猬,面具乃以汲水器为之,涂以朱墨,则楮 乱粘而已。明日传视,见者俱大笑。王至今犹衣其裘,但未稔其 人雌雄。"

(《带窗异草》)

老学究

爱堂先生言:闻有老学究夜行,忽遇其亡友。学究素刚直,亦不怖畏,问:"君何往?"曰:"吾为冥吏,至南村有所勾摄,适同路耳。"因并行。至一破屋,鬼曰:"此文士庐也。"问:"何以知之?"曰:"凡人白昼营营,性灵汨没。惟睡时一念不生,无神朗澈,胸中所读之书,字字皆吐光芒,自百窍而出,其状缥缈缤纷,烂如锦绣。学如郑孔,文如屈宋班马者,上烛霄汉,与星月争辉;次者数丈;次者数尺;以渐而差,——极下者,亦荧荧如一灯照映户牖。人不能见,唯鬼神见之耳。此室上光芒高七八尺,以是而知。"学究问:"我读书一生,睡中光芒当几许?"鬼嗫嚅良久,曰:"昨过君塾,君方昼寝,见君胸中高头讲章一部,墨卷五六百篇,经文七八十篇,策略三四十篇,字字化为黑烟,笼罩屋上。诸生诵读之声,如在浓云密雾中。实未见光芒,不敢妄语。"学究怒叱之。鬼大笑而去。

(《阅微草堂笔记》)

南皮许南金

南皮许南金先生,最有胆。在僧寺读书,与一友共榻。夜半,见北壁燃双炬。谛视,乃一人面出壁中,大如箕,双炬乃目光也。 友股栗欲死;先生衣徐起,曰:"正欲读书,苦烛尽,君来甚善!"乃携一册,背之坐,诵声琅琅。未数页,目光渐隐。拊壁呼之,不出矣。又一夕,如厕,一小童持烛随。此面突自地涌出,对之而笑。童掷烛仆地;先生即拾置怪顶,曰:"烛正无台,君来又甚善。"怪仰视不动。先生曰:"君何处不可往,乃在此间?海上有逐臭之夫,君其是乎?不可辜君来意。"即以秽纸拭其口。怪大呕吐,狂吼救声,灭烛而没。自是不复见。先生尝曰:"鬼魅皆真有之,亦时或见之;惟检点生平,无不可对鬼魅者,则此心自不动耳。"

(《阅微草堂笔记》)